

隨

園

全

集

外

集



小倉山房外集卷六

錢唐袁枚子才

贈提督任勇烈公神道碑

山西出將應運生祈父之才巴蜀從軍從古落大星之地故知玉粲之瑟其瑛猛也沉檀之貴其香焚也苟推轂於凶門必立懂於天下乃若兩軍未懋方交河曲之綏三鼓不上竟墓宜陽之郭勦勦將軍今得之勇烈公矣公姓任名舉字漢冲大同人也毅而能擾剛而不彀受風后之金法作楊公之鐵星年十七應募爲兵均服振振勇可習也戎容暨暨望之威如中雍正二年進士選陝西柏林守備征巴里坤有功調甯夏都司大隗異災編氓殲焉公散所稟假瑾其捐瘠無穢虐士高築哀邱上游嘉之擢固原遊擊會提督標同文耀等作亂半夜寥寥一軍踰藉諸將佞者伏僕邀者逃公手持威械馬束殷緇解刀授妻登樓發鑿越王圖士闔門不辱之心子反乘堙扞衛侯遮之義賊有攀垣上者公斬而擲之頭墮半空膽落羣醜寇來不上我武維揚追其奔逸提兵巷戰以五十健兒當百千虓虎立當前疾呼彼下風子產尸盜成列而行葉公赴難免胄而進卒能嚴關鐵牡解散銀刀城中被掠哭聲殷天公下令曰掠民財者許昏夜投繳過限者誅契箭一傳革言三就爭還趙璧暗歸楚弓當燒撥焚杆之餘爲翔旂雲鞠之取雖地名回洛刀號定秦不是過也固原平

天子召見曰爾才大可用惜朕知之晚也命王常之位與諸將離席許摩訶之寢置鴟尾養威虎將名馳龍光寵大會金川苗反天子詢以方略卽擢西鳳協副將馳驛赴營尋遷重慶總兵當是時總督張廣泗與經畧訥親不相中也公柴立無阿危事不齒陳運糧之累作

益兵之請當事者銜之命攻昔嶺拔山而進公望昔嶺險絕惟迤南一溝可通苗卡乃命別將佯言攻嶺而身率精兵從僂道入方誓蒼兕以渡河忽輟雲梯而下宋人非著翅肉是飛仙驚柴紹之壁龍橫行七跡信敖曹之地虎雄入九軍奪取其卡賊大懼復築色兒力城壘石而守公分兵從木達不多兩山攻之烏權鳥絕白羽蟲飛然離賊巢刮耳崖已三十里矣公請以步步圍城法蹙之不半月苗可匡平經畧不許尅期命進公明知遁甲孤虛開山有日龍頭天竈冒險無功而業已卜戰龜焦還營路斷遂攀梁麗而上果受飛礮之災乃北向叩頭曰臣今以死報國矣薨年四十有六嗚呼痛哉酸棗壇高臧洪首歆螯弧旗拔考叔先登方期饜翫蜻蛉萬歲仆碑而進豈料蒼梧南越千秋一奮而亡國有人焉誰之咎也然而公始則霽雲斷指繼乃公孫洞胸小白未僵大黃猶射又典韋臨危之戟橫貫數人衝張遼已出之圍再呼殘卒淺色黃衫蓋棺之衣早備元纁新篋歸元之面如生可以謂之勇矣可以謂之烈矣事聞天子賜諡加提督銜祀昭忠廟廕其子卹其家公之恩禮世盡榮之公之苦心人未諒之今夫將擊卑飛者蒼鷹也十步九計者老將也死綏者節之小活國者忠之大不偶者命之隻養威者器之宏以故或置兩驂於左拒或帥七覆於敖前罕羌易馴營平違詔邯鄲難下武安不行公雖氣湧如山亦識垂堂有戒肯捨不訾之身作鹵莽之報哉而無如二憾方構十全無術甘凌鬪忿盾舞難分渾濬爭功風利不泊哥舒受逼慟哭出關周處無援孤軍殉節古英雄之人處兀屯之地急繕其怒授命如毛成仁慷慨之場不死無名之所直以瞑目畢見天之志茹劍有含飴之甘豈徒沾沾然冀高國於生前卜鼓吹於死後而已耶在易象曰困君子以致命遂志勇烈公有焉初公以川兵恇怯紀律不嚴乃變其

徽章廣招梟俊曲轅贛服增羅闐狗附之防扈帶鮫函有火正壇丁之號帶其斷作三日之狗傳其弓作一軍之觀故能九上九下兵如刺蜚三遂三郊士無縮甲及公之亡也山河子弟猶張呂氏之旗百保鮮卑空喂房公之馬坡驚鳳落地慘彭亡覩黑騎以夢將軍騎赤牛而思都尉其能無勞面生哀守陴盡哭也哉公重仁襲義辭隆就窳校尉高官雖屯戍己袁安故綬不具丙丁至於熟左氏相斫之書通呂蒙嘆語之易執筆如上馬磨盾即賦詩則又蓋臣之雅懷介夫之餘事也長子承恩年八歲天子即召見擢侍衛次子承緒亦補京口守備以某年月日葬公於城東木坡寺之賜塋三夫人祔焉日中而窆機合而封元甲負土黃封讀祭固知廬山九仞難銘上將之功石馬千年尙作勤王之狀

銘曰人誰不死鬼獨稱雄一日碧血千年白虹任公挺生熊姿豹狀兩目眈眈凌烟閣上初掃鷓鴣長鯨息浪再討駒支崆峒劍傍坎旣入險乾難用壯克敵致果輿尸歸葬事聞於朝璽書悽愴司勳銘功太常繪像幣純四殽銘旌三丈 聖主之恩忠臣之樣

御祭卞忠貞公墓紀恩碑記

乾隆十六年三月朔

天子南巡狩至於攝山命經筵講官刑部侍郎錢陳羣以少牢祭晉故驃騎將軍卞公之墓其裔孫某屬江甯令袁枚紀事於碑枚謹按忠臣不邀賞於異代而盡節聖人不責報於幽壤而加恩誠以節不可改謂之忠禮不可廢謂之典死有萬端祇疆場之功大祀有七典惟忠孝之道光昔東晉堙替強藩騷蘇子冠軍歷陽跋扈量錯發大難之端而不知爲計徐福抱先幾之智而不用厥謀遂致禍起徵書變生肘腋其時犬戎長狄分裂中原尺籍伍符

半招烏合而且雷池一步阻外諸侯之援白門三重撤小丹陽之戍祝曉之矢漸逼騶虞之
幡不靈凡覩白書空自矜清貴者不能揮塵代戈談元曉賊王茂宏標舉海內不握子印之
節陶士行搖動義旗幾失桓文之勳惟公身居奕國志奉孱王軍孤轉先旗折更進卻克中
矢援桴未停荀偃生瘍張目猶視金鼓一震背創盡裂流元黃之血爲蒼生分痛決養癰之
患爲國家隕身童子何知執干戈爲嬰鬼母氏含笑喜兒孫作國殤朝中瓦石生則常含塚
內空拳死而猶握海內痛之朝野惜之古有社稷臣公之謂矣然而神仙羽化尙戀冠巾烈
士魂歸常依弓劍銅駝星散誰知司馬之諸陵宰樹霜清尙識將軍之古墓 皇上思棟梁
於前代買馬骨於灰塵特命大臣刑牲讀祭灑九乾之雨露直達窮泉感兩晉之衣冠能無
流涕日月照幽光而愈大旃檀隔千歲而彌馨枚守土有年思上彥昇之表下馬肅拜未奠
何點之觴見周武封比干同爲舞蹈喜漢廷祭楊震不愧犧牲嗟乎白骨一抔增國內山川
之色黃封三錫勵古今臣子之心嗣孫某世系蟬嫣不比熊光哭墓 君恩烏奕應同武子
銘鐘爰勒貞珉式彰盛典傳諸奕葉鑒此哀榮

重修于忠肅廟碑

在昔玉弩驚天之際金甌墜地之辰必有再造元黃重扶日月者斷鼈足以奠三靈挽銀河
而清八表是以少康纂統仗有夏之靡臣宣王中興倚成周之方叔不有君子其能國乎然
而書於大常祭於太烝者國家報功之典也畫入丹青祀爲宗布者後世褒忠之禮也豈有
建熙天耀日之勳而弓藏東市負紫嶽皇靈之望而廟朽西湖其何以鎮撫神祇光昭星斗
此我滋圃莊大中丞所以有重修于廟之舉也正統十四年公爲兵部右侍郎天子非穆王

而征犬戎聽朝恩之幸河內賈驪山之禍應豆田之謠景泰加公尙書總督軍務當是時也
三邊烽火光照甘泉七萃蟲沙煙消甌脫申息之北門不敢瑯琊之南渡諠然選仗則武庫
甲稀勤王則紙鳶信斷哭連鸛鶴難回野井之君殿擊蒼鷹反逼孱王之走加以大風遺孽
麻起青邱小醜營魂騷騷碧海也先以爲江上投鞭早無建業夢中伸腳踏破長安矣公乃
手揮日光泣同天語簫勺羣慝張皇六師辛毘牽已起之裾郭憲斷將馳之鞞劉超妻子徙
入宮中王衍車牛獨賣都下誅中行說以除其姦焚洛口倉以絕其粟九門列陣持螯弧先
登八鎮開關使老罷臥道三郊三遂旌旗爭荼火之光五甲五兵號令肅風雲之氣而且口
授韜略耳聽羽書百函飛馳五版並入麻思受命及關而郡縣皆符劉晏運糧臨河而舟車
悉備贊皇易三十六節度奉令貫行桑公揮一十五將軍寒毛惕伏故能東靖孫恩南殲嚴
虎西擒雕庫北懾呼韓其大旨以爲天下者高皇帝之天下也社稷爲重君爲輕惟戰止戰
澶淵所以盟契丹喪君有君田單所以守卽墨苟立太子以絕秦謀則趙王返矣倘盟龍門
以求齊嬖則就魁膊矣公抱喬元捐質之心作鬻拳不納之狀借廝養詭詞之說爲瑕甥拔
舍之迎不聞四諭堅昆五求回鶻而果使暉臺鼎返大歷鐘還日乃再中天成兩旦父老伏
地重聽故主鑾音鮮卑禁聲送出家兄皇帝天生李晟原爲唐室非爲德宗也然而懽舞雖
聞於海內勤勞不出於口中乘馬三年不知牝牡瓜廬一室儉若布衣劉宏以至尊蒙塵撤
管絃絲竹陶侃以暮年辭寵上羽蓋旛旗公之勳子儀似之公之讓子房愧之亡何紫微動
於中天赤眚生於御座壬人行險乙夜貪功妖似許龍迎海西於吳郡忠非伊尹返太甲於
桐宮以有功之誅飾無名之賞以干奴之共膽搖一柱之擎天非叔申改立則鄭伯焉歸乃

衛侯還宮而元咺先殺何必血流三丈心趨百回而早已地起愁雲天飛冤雪及至樊豐敗露遣祭關西虜馬臨江方思道濟嗚呼晚矣說者謂北征非畋遊之比迹類宋襄太叔有竊位之心事同扶檠而公但佐日夷守國不勸叔武迎兄者何耶不知原繁不貳乃拒厲公忠之至也蒙穀負書不徇楚難臣之則也時平則先嫡長世亂則先有功英宗寵用中涓形同欺魄薰轅天下雕琢大臣縱無也先宗社未必不亡也景泰以元二之災年際靖康之戾運朝中麴索半已披猖左右汪黃豈無交誼而獨能假茂宏以安東之節信伯紀爲端右之才從善如轉圜受諫如流水禁門鎖鑰鄴侯到而後開空紙文書蘇綽批而即下一則以刑餘爲周召一則以閩外付夷吾一則以鞏固之金湯擲同破甑一則以孤危之朽索馭定飛黃苟高祖之有靈問神器之誰屬且夫乘楚車而蔡許不書謂之失位受秦輅而夷吾返國已辱先君元聖西歸苦讓忠王繼統赤符受命不憂成帝復生英宗旣曳青衣難乘黃屋而乃齊侯似鼠甘晝伏以宵行衛國如棋竟朝更而暮置追憐媼相忍斷尸臣獨不念五國冰霜棺歸朽木六宮妃后灰洒南風者彼何人斯獨非蒙塵之主耶若公者可謂德茂安劉功參微管者矣說者謂景泰情私七鬯器改春坊公竟無羽翼之扶坐視愍懷之廢者何耶不知禹圖授啟非夏后之德衰宋禍傳殤是公羊之論正賢如東海猶因廢母而降尊孝似李班終爲奪宗而受禍他若玉珎手握乞阿叔爲奴金翅鳥飛食小龍無算者固無論矣夫手挈江表而授之仲謀者不過子紹封侯豈坐鎮天樞而廟可中宗者反使田榮奉市乎公黃纒未著青浦何爭震作長男自按乾方而定位星明少海應隨帝座以移宮倘必故劍之求而捨吾君之子是不諒人只反易天明也公屑爲之哉說者又謂公有迎立襄王世子之謀雖

毛卵鉤鬚事原烏有而臚言風聽謗豈無徵不知大臣者以安社稷爲容悅者也國無奧主且熏丹穴求君朝有元良當抱孟侯擁社假使公見鼎湖之龍欲墮大庭之璧未埋竟欲遠奉晉安近迎河邱亦何嘗非社稷臣事而況麝臍不露輪獵無聲乎說者又謂公身領九軍夜司三鑿何以尹亡環列門失倉琅使產祿遽入北軍亮晦得窺星象不知公能以中周虎落之威隄防北虜何難以擁鐸拱稽之衛設警南宮所以不爲者射生五百慮太上之馬驚植璧三壇禱元孫之病愈故也不然以景帝之雄猜而沙邱主父探轂無聞黔邱雍王摘瓜未唱生金免頒於姑孰藥杵停擣於黃門謂無人於穆公之側而能如是乎又說者謂章廖諸賢以周昌擁衛之心受子諒朝堂之杖帝雖暴抗公合維持是則姬公難離責君爽之模稜先主西行笑孔明之坐視沃心匪易騰口何難嗟乎非三代以下少完人實一孔之儒多目論也吾浙西有伍相祠東有岳王廟皆公鄰也枚以爲白馬銀濤三吳竟沼紅羊黑劫二聖安歸自有公而後知魚水君臣不須死諫南朝天子原可生還使二公地下相逢益當悲生江上之潮而淚灑南枝之柏矣我滋圃大中丞章志貞教肅禮明禋易棟宇之摧頽表神旗之烏奕將刊元石遠命鰕生嗚呼與其築鬻焚椒奠四時之俎豆曷若崇論宏議掃萬古之蟬蛸用是磨洗孤崖增立表忠觀之碣濡染大筆竟書謝太傅之碑

兵部左侍郎凌公神道碑

公諱如煥字榆山松江上海人也生而羸弱瘠若植鰭長更矜莊宴如覆杵賦弈棋於七歲辨燈盞之四聲弱冠爲督學韓城張公所知舉陸遜爲茂才置班彪於幕府文章傳世風行誰闌富貴逼人日照難避康熙乙未登銀榜入玉堂

聖祖命習 國書與修 三朝國史隄官槐備擇樂木之聲歌元扈翠嬀紀循蜚之譜牒公侍立不欹隔爐獨對答帝邱之間辨冕旒之儀凡 朝廷有大典禮大詔誥必召而付焉河圖四十六事梁甫七十二封俱能口吐神珠胸藏冊府雍正元年遷侍講督湖北學政公古尺獨攜靈犀孤照楚國才拔漢江風清舉楊可鏡爲貢生以其曾祖漣盡忠明代故也辟陶潛之孫子聽請無聞拒李紳之私書態臣不悅有劾奏者

世宗特旨褒公授楊吏部主政周武封殷比干之後晉侯賞舉卻缺之功主聖臣賢於斯爲盛遷內閣學士兼禮部侍郎八翼風飛九乾露沃賜高馮以銅鏡因其善鑒人才飲思話以銀鍾爲其心如金石公無思不覃有得必告議歸州之水程論河南之開墾請增官渡請賑流庸 制曰可於是浪平三峽勝塞沙囊土定五施不差圭撮汲黯有開倉之便王琪無按籍之征十二年以母憂去位十三年 世宗晏駕公風木方悲龍髯遽泣翔禽朝下松柏爲之不春旭日西沉葵藿因而憔悴蓋沈約之腰圍減瘦元謨之眉頭不伸基於此矣乾隆元年 今天子即位遷兵部右侍郎典試江西其時浙之北新關塵人斂布英籜不通公還朝劾奏 天子是之建封入覲除官市之鴟張蕭疑愛民平荊州之檣格四年充會試總裁枚此科進士也退之爲宣公所知孫逖得顏卿而笑馬首無噪龍門獨高六年公以養親乞歸奉 旨給假不必開缺若需奉養再行奏聞虛左席以疇咨假銀青爲誓約一時中貴半趨下風供帳東都送疏仲翁而隕涕舉頭天外望班景倩如登仙長安之日雖遙太行之雲已近到家上書乞恩解職朝廷使候官如白鷺翹望公來先生以孝子爲慈烏終身乳哺於是觀樂欵崔郊之帽厠淪浣石奮之裙願作人兄事親之日果永身爲國老居鄉之禮尤尊然

而 聖意欽遲

天章屢降寄上尊之酒頌赤側之錢華黍歌終驚聞淇露斑衣舞罷捧到吹綸承歡則三御鯨波上壽則萬釘寶帶曾參祿厚已看鐘鼎同甘耿況年高更曳金章侍疾堂上百歲車前八騶畜君何尤安親爲上人倫之盛海內榮之十二年封公卽世公當不毀之年極懸壺之哭風吹欲倒溢米不餐遂患脅痛次年八月四日竟以不起享年六十有八嗚呼痛哉公初以匪莪之哀思叩頭辭位繼以尊靈之永蟄咯血危身能極生榮更兼死孝可謂賢矣子應蘭乾隆進士扶襯葬於先塋禮也枚出大賢之門熟長者之教見公謙常儉身儉不逼下白圭無玷赤袂有光與裴綽談如聞古瑟共蘇瓊坐已入青雲魏舒先行後言人不知其去位蕭嵩當寵辭祿帝自解於厭卿老子猶龍不見雲中之尾聖人如柱能全物外之天方擬玖陛乍辭星冠重耀而不謂月蝕東壁鄴侯仙歸雞逼酉年謝公恒化魏徵亡則朕失一鑑奚斤老而誰說三朝宜乎四野停春九重撤樂而況侯芭侍側親傳揚子之書子貢築場手植孔陵之樹者乎乃爲銘曰

華蓋一嶽文昌一星扶我景運揚於王廷正色立朝能無葵傾親已高年 帝方大用公乃瞿然審所輕重爲子者一爲臣者衆周暢手驚黔婁心動急叩丹墀願歸家弄 天子曰俞允汝南還母意母必惟汝父是觀公拜稽首臣不能離左右父病難痊職曠難久願別簡賢臣臣死不朽嗚呼父旣委化子亦考終不屬不離一年之中風在位者知所適從人以爲孝帝以爲忠

東閣大學士蔣文恪公神道碑

昔軒轅撫運而感大風伊尹乘舟而過日月陶子生五歲而佐禹金提建萬福以輔羲此皆名世應期元良合德者也是知天地泰交山澤通氣鹽梅桴鼓神化丹青蒼牙通靈昌之成五期有數赤伏表黃星之兆一柱承穹盪琤嬰環非漢唐之壤奠雲師火正本岳瀆之神祇吾於座主蔣文恪公見其人矣公諱溥字質甫一字恆軒大學士文肅公廷錫之長子也翼九宗五正代作尸臣漢四姓小侯爵歸門子公生而泰表戴千眉目如畫入市疑壁吹風欲仙蒙彼縟絺展金屏之四葉佩其象掃開銀函之九羊十三歲 世宗召見奇之說文侯之命識丁鴻不凡誦傳說之言嘆蘇夔有子己酉 欽賜舉人庚戌成進士殿試時

上親擢爲第四選入翰林文肅公叩頭辭讓 上曰朕從未見爾子筆迹暗中衡鑒毋庸辭也以紅休之封待綠車之幸月昇東海早掩星光雲近太陽自然金色隨召入南書房行走辨成王之舜冠答平原之堯韭釋顯節陵之冊文記乾德年之宮鏡俱能學古有識數典無訛與文肅公先後侍直談遷共事瓌頰同僚延年孝思坐臥不當舊處夏侯績學纂修能繼前人

今上登極累遷吏刑兩部侍郎公奏寬科比以廣擢遷添司曹以免推諉 制曰可於是謝笑顏嗔不呼平配潘詞樂旨卽是刑書出署湖南巡撫五申統律十部宣風平八索以成人操六誓而觀義糶空倉穀栽隙地桑爐消未子之錢隄得攜流之法乘輦輅以開山治同熊繹入國門而免胄人愛葉公尋遷戶部尙書軍機房行走召羲叔於南郊爲咨亮采使咎單爲圻父將理陰陽命協辦大學士仍兼戶部尙書當是時也鄭武公再世司徒韋元成一門宰相墨車入殿鈴鼓不張非膜受彤弓卽詩懷鑿鑑人以爲人主之恩至矣人臣之榮極矣

而不知公出則扈蹕乘夏縵以犯風霜入則持籌掌牢盆而算咳極訐謨辰告五夜覃思排比天章萬行勞日靖共九賦無羔羊之間賡唱三雍有卷阿之奏重恩壓己所在心驚大義滅親更逢家難雖蔡叔不咸歐刀自有國法而揚於旣戮跣行終竟心傷以致齊丈悻盧楊彭羸瘦蓋實授東閣大學士之命再下而公之病已深矣然 皇上望公之速痊也頒珍藥召良醫免償帑金加公子櫛侍講張禹假歸賜上尊胎穀王猛有恙禱名山大川兩降 鑾輿三加襍服扶牀捧日伏枕捫天幾乎鑿壁以窺呂蒙加紉而封丙吉問桓榮之病侯王相率步行安景仁之心西州禁聞車響飾終之禮震古耀今眷舊之情隆天重地亡何馬肝之石不靈東生之散無效 上覽公遺表雪涕罷朝命依前大學士蔣廷錫例柩歸時凡文武官在二十里內者俱向靈前奠酒一切卹典悉從優渥較之武宮聞訃而去簫柳莊善邑以納棺投綠沉之瓜傷彥升之逝發元甲之卒治去病之塋者雖哀榮相似而矜寵尤深公侍經筵者六讀殿試卷者八總裁會試者三典試浙江分校禮闈者各一枚卽公已未分校進士也嗚呼痛哉習鑿齒不過桓公則荊州老從事耳宮牆已遠難築室登夫子之場桃李雖多將執梃爲門生之長親見公靖共六察遊戲三餘彈指蘭閣傾衿逢掖八音濫耳偏古樂之先知五色精心必黃中之獨辨兼之風神元定容止詳華雅思淵含清襟蘭郁袁安不肯錮吏張歐未嘗按人渾濬爭功唐彬不至鄧吳受賞賈復無言顧雍侯封三日而家人不知曹參日飲亡何而海內甯一可謂八咳之聖相三古之侯釐也已說者疑公閣手仰成觀空署白癸謀輔志未有聞焉不知房杜無功蕭曹無政問相公賢否視天下安危當今神雀來而遠夷賓當康見而五穀熟重黎氏絕天人之交百神受職應上公通雨暘之事萬物丸蘭

舜琴裁鼓黃河已清湯
阨未升白環盡貢皆
主之聖也卽公之功也
又說者疑公室多傾
視門有雜賓王陽服節
鮮明劉盱用財過濫則
又不知體大者迹疎內
詳者外略千里之路
不可扶以繩億兆之
都不能平以準日月含
蟲鳥之瑕不妨麗天之
景江河藏魚龍之孽方
成潤物之功蓋祿萬鍾
原爲德賞卿備百邑不
尙苛廉以故陶士行僮
指千人大勳卓爾杜
黃裳賂遺萬貫中興赫
然公以黃散之門風視
赤側如土芥金花銀燭
羊公愛客之心豪竹
哀絲謝傅中年之感門
張鷟尾合表徽章鬢映
貂蟬益增華采蓋其高
掌遠躡開國承家原
非苦節之貞自有甘臨
之吉也而況綺羅雖盛
幾曳夏侯之衣束紵無
多半質長沙之庫身
非債帥逋券成行時見
焯人停炊告急所謂清
其本而華其末豐其外
而儉其中者公之謂
也彼太尉之府若乞兒
東閣之餐惟脫粟者其
足當公一映也哉公酷
愛吟詩別無他嗜披
一品服坐九花虬揮金
管之毫落雲藍之紙逸
情颯發藻思泉流往往
天子領頤詞臣避
席焉薨時年五十四初
娶汪氏再娶陳氏三娶
王氏俱誥封夫人子六
人長櫛官兵部侍郎
次賜檠江安糧道餘俱
以官職世其家以某月
日葬虞山賜塋嗚呼公
琴在望誰爲復土之
將軍宰樹長青我是種
松之弟子

銘曰百辟論才三公重
器器果恢宏羣才驅使
大哉夫子淵乎莫窺地
厚物載海深水歸贊
堯光被佐舜無爲存神
翬翬成功巍巍保合太
和率循大卞翠鳳含綏
黃龍馭辨福善來索
爛其盈門金紫侍疾賢
子令孫紅粟萬石朱輪
十人已畢臣力未盡
君恩哲人恒化卿月
雲藏厥旌搖風夷檠隕
霜祈連冢大毫姑書亡
表茲元石永鎮黃腸

六營公立兩江總督尹公去思碑

夫聖相道行安民必用武健兒性直知感莫如兵古之人庚念其軍帥者或銘謝城之功上
邨閣之頌建變公之社拜石相之祠莫不夸鳧藻奮鷹揚在當時爲詠歌傳後世爲聲響况
乎深識九變妙察六術義路霜肅仁風澤宣十年有積貯之糧千里無拾遺之事如今大學
士望山尹公者能不謳思哉公之督兩江也以端右之才敷塞晏之化沉幾應智濡迹匡時
常以活國爲首謀撫軍爲餘事丈人律重君子營高樹六枳以爲籬飭三嚴而聽鼓早已師
不陵正旅不逼師七萃帖然兩甄顛若矣每至霜落演龜劉之禮迹人有介藥之告公則朱
旗爛空元甲耀體募僧騰客招曳落河罰必當郵賞無慮渴訓之如子弟敦之以詩書辨斲
鐸而琅闐無訛教步伐而踔踔應節爲鵠爲鸛先偏後伍之彌縫如火如荼八陣六花之出
沒洗洗乎被廬之帥畧細柳之軍容焉雖然可久者賢人之德也可大者賢人之業也土狹
則草木不長資淺則功德不茂倘河東借寇不過一年僕射稱周僅止三日公亦不能蕭勺
羣慝張皇六師爾乃開府卅年持節四次戎容暨暨黃髮皤皤警角吹鞭半是軍門箕帚奇
材劍客無非竹馬兒童恩以樹而愈深政以習而彌肅故劍不必試蒲元刀不必詢楊僕揚
威不必畫干櫓識面不必去兜鍪凡夫水犀陸隊野戍村烽革抉戔芮之防弩父享公之設
莫不綱渠彌於有階塞堯确以夷庚陳洗星芒營空海霧銅駝無恙鐵牡常關民之慶也公
之力也今年

天子南巡公念毛馬而頒承華或缺特奏廣庾人之額備騎士之需 天子制曰可於是吳
驂走練增渠黃山子之材楚騎追風馱橫水明光之甲使燦燦雲霞之色旄頭耀儀仗之
形可謂石畫無方羅縷悉貫者矣九月初六日補文華殿大學士入都抗手六軍雨泣熊羆

之士焚香九鎮金鑄鞞畧之書召蔡茂於荊州襜帷望斷登仲華爲太傅部曲心孤某等或大父童孫累世同依麾下或三貂八座起家半在轅間每憶馮公遙瞻大樹感恩子重便望旌旗爰紀五事於郭沖書數行於孫綽雖編堂垂範明知非郭丹之心而冒禁刊碑終難忘阮畧之德乃爲頌曰

穆穆尹相克佐隆平秉鞭作牧久鎮金陵能耀七德以佐三曾吁荼萬物阜牢羣能常羊之維奉令貫行陵水經地威燁旁達智可奪梟勇常設爵隊肅銀刀歌騰鐵拔組練三千蛇矛丈八罔敢籠東而不操刺神偉烏奕厥勳隆隆王鈇藏鏘蕭楯斂鋒聞公警欵玉燭消虹受公平章金甲春農冒彫有慶橫草無功一朝枚卜逃矣旄麾登於九乾匪我能私凡我同袍含甘吮滋彼葭又茁甘棠生枝公歸不復如之何勿思

餘杭諸葛武侯廟碑

餘杭宋村有諸葛武侯廟或曰臺駘實沉屬晉室之占江漢沮漳爲楚邦之望武侯功在西川廟留南國何也余曰子但知侯之有功於蜀而不知侯之有德於吳乎當夫本初兵敗當塗愈張劉表身亡長江無主仲謀者鄭爲奕國趙本孱王聞有曹兵驚回秦孽張昭計將乞食文表志在迎降惟侯遠降巾韉笑揮羽扇激昂事理捭闔談鋒借籌定覆楚之謀蹈海拒帝秦之想於是東風一面焚盡餘皇旗蓋三分永成鼎足蓋用吳以敵冀北者公之所以忠於漢謀也通蜀以保江東者公之所以善爲吳計也以爲漢賊在魏而不在吳兩國宜和而

不宜鬪雖逆順之理應爾亦堅瑕之勢昭然惜乎貉奴不達虎將自矜子明靡蝥之雄何知遠計伯言目論之士但貪近功當雲長威震荆襄之時正阿瞞議遷許下之日不乘此連環

倚角電掃颺馳分南北之兩朝作東西之二帝而乃鄙同索責知等挈瓶婚姻生銅斗之仇散博失梟棋之智一則稱臣納質爐火乞憐一則暮氣忿兵獠亭撓敗何其悲也侯獨追懷大計遠鑑前非傳書則便許通和踐祚而旋思報聘念相脣齒肯寄腹心及至劍閣不支陰平深入絕不聞輕舟來救驅南國之兵卷甲疾趨列西陵之火視同舟爲胡越等一室於鄉鄰者豈不以劍閣旣沉庸與金陵之興廢涪江雖斷何關建業之重輕乎然而王濬樓船即用益州之衆張華棋局先收杜預之言勢有類於滅虢取虞事竟符於并韓弱魏然後知公之經營梁益即所以聯絡武昌也締造巴渝原勿異周旋吳會也假使天星不動火井長明食少無妨鞠躬如故則竭司馬囊底之智難當木牛渭上之兵不徒孫郎之宗社未敢覬覦而且魏武之山河無暇篡奪矣然則侯之廟豈徒俎豆於吳邦侯之功兼可烝嘗於曹社吳人思桓王之創業感大帝之垂基惜其孫子驕淫君臣疏忽而侯之良謀偉算親仁善鄰規模如是之宏也是以歲時臙臘霜露星河做爨公立社之文作朱邑桐鄉之祭亦天良之不容泯者尙何疑哉尙何疑哉余旣爲釋立廟之故而又爲迎神之曲使歌以祀侯其詞曰
謂是侯廟兮吾民喜謂非侯廟兮吾民悲民亦何知侯之忠吳與忠漢兮而但欲奉侯以爲歸廟前兮有桑童童兮蟠穹蒼廟後兮有柏參青天兮黛色村之岷兮鑄銅鼓村之巫兮巴渝舞味淡泊兮陳稷黍侯勿蜀思兮享此土福我民兮萬萬古

此吾鄉吳慶伯先生文也勒石者嫌其過長屬余做鄭亞改義山序一品集故事

莊西麓先生墓表

乾隆二十一年莊西麓先生卒於江甯其子經畬輿機將葬以墓表爲請枚謹按先生諱柟

榮字西麓其先由金壇徙毘陵父令輿官翰林公其季嗣也權重三荆行居四括生而愴定
長更徇通讀父書則每旬呼諾聞兄喚而隔牆整巾太史愛其至性命侍長安花磚歸晚手
進烹雌玉漏晨趨門應題鳳見長豫而輒喜知阿恭之最真夫人楊氏來歸生經畬而遽卒
公裁二十六歲下感華元上師楊秉室無傾視庭有斷絃竟使鏡檻罷春繩牀臥雪犢子愧
朝飛之曲伯奇絕野放之歌已而太史假歸公率經畬柔色以溫無形而視伏虞悰於戶外
湯藥聽呼侍文若於膝前起居扶杖宮錦一襲板輿廿年孝致蒼烏祭生福草聞者羨海內
人倫之盛識者歎先生色養之難俄而經畬舉於鄉成進士太史椿萱猶無恙也撫范馨之
硯代有傳人生苦越之兒功歸名父亡何太夫人奄逝終七太史捐館公括受襪衣詩懷菹
豆四方觀禮一口稱賢十年經畬知建德縣事調盱眙公含飴裁暇便問平反皆憾小閒代
稽荒政卒能布麟趾之格活鳧沒之民大府於是轉平陵之薛恭換鉅鹿之尹賞公之教也
癸酉秋經畬抱飲章之痛雖非上測已受平鑄而公牛盲不驚馬失更喜今年

天子南巡大府命經畬辦供張事奏請復官迎公於盱眙之人飲水思源登枝尋本莫不縣
僮布路邑子刊碑樹喬梓以當甘棠進壺漿而佐秩膳為民作爹封公居大父之行似佛留
躡合郡有焚香之送居白下兩月疾終松三堂年六十有九嗚呼痛哉趙臺卿聲名方盛所
怙先亡李日知封誥重來高堂不見服衰而登夏屋遺命殷然

經畬留差局守制

憑兒而誦虞書先

靈聞否宜乎垂髻戴白者舉音過喪贈稅題棺者名流畢集驢鳴江左爭號武子之靈山折
武當齊悼文公之阨更可異者經畬捧檄蘇州得信歸來以六月二十七日解征驂而公以
六月二十八日昇淨域訣猶生之面於千里之遙假半日之程慰終天之恨故能基報國

恩藏條家事考終協吉恒化無違以視歸父身還空悲括髮黔婁心動裁得承衾者直不可同年而語矣公友愛尤篤常在官舍嘆曰見吾昆季如見先人於是劉基臥內偕羣弟以晏眠傅昭席中尾衰兄而扶曳紫芝哺姪兩乳流潼 鑿撫孤含飯滿口雖穿漏之屋無多寄公之席甫定即欲招士龍於日下就嘉祐於岐州宰樹將封荆枝尙暖墳簾未奏薤露先聞非愛結於心義形於色者其能與於斯乎其行己也踐繩其接人也用緹似然淵其志皎然潔其衷九宮賦其銳銀三族欽其方格故經畚鍤綰十年家無媵畜借公瑾市南之宅暫挂厥旌受辟陽賻贈之餘聊供溢米此又清白傳家之明驗也然而胸襟若海意行似天捧 爵之康娛策扶老以流憩潘璋酒債立滿門前崔立書聲驚聞松下凡鄉里之殷兄張丈故人之桂子椿兒靡不轄投井中屢交戶外少時射策專精儒書晚課諸孫親爲庭誥楊遵彥之食不許輕嘗王方平之鞭殊非易得操之已蹙疾乃不斟蓋含珠屬纊之將臨猶鐸振鐘鳴而未已可謂有覺德行無忝貽謀者矣枚望丈人之行未挹龐眉聞長者之風長傾飛耳抽絲萬繭偶得片端挹水九河初揚一勺取楚國先賢之傳刊化臺元石之文陽卜可貞幽光不泐

誥封奉政大夫江南左營遊擊署城守副將加三級孫公墓誌銘

公諱品字鑑倫號立之浙之仁和東里人也江東望族本雲臺綴組之家浙右人門多天閣縹纓之客公生而穎異長更聰強恥絳灌無文乃甘陳學武龍泉太阿是王彥深之知己清風明月爲謝希逸之飲徒凡卻穀詩書軒轅營陣許商算法猿女劍篇莫不心領元關手嫻道器雍正四年宮保李敏達公總制浙江見而奇之舉陸遜於茂才不勞三辟拔子儀爲武

舉首冠一軍愛其端右之才爲置虛左之席桓元子蓮花幕內惟有希超房次律曳落河中誰當劉秩俄而李公調直隸總督攜以北行乾隆元年補督標千總公領銀刀歌銅拔手爲天馬舌如電光耿豪是丞相之肩隲朋號夷吾之目未免神鋒難犯顏色未鋤遂致赤舌燒城青蠅集鼻寵遠遠者八人譖田單者九子蛇矛未折魚服先囚公自表赤心擲梟盧而六子盡赤再投銅匭訴飲章而五版並馳卒能開九棘之門封三錢之府玉焚不碎金爍彌光後制府孫文定公慕其通明命爲答教公洪鐘待扣嗚矢當弦策類姚崇分捕蝗爲十道智同韓滉勤負米於一囊識苟變爲五百乘之才拔卜商於十三行之後擢楊村守備水大鱗舒風高翼展筆研財用位置無方略之差甲冑弓刀彩畫有文繡之色十年

聖駕幸五臺山公扈從檣桓動中機宜張設艾旃不差尺寸練兵則如荼如火布陣則爲鸛爲鵠天子有鴈門細柳之思加火鑑大鱗之賜其年朱家峪口米賊風聞西蜀金川峽徒

草竊公乃靖張嬰之亂於廣陵運姚豹之糧於譙郡楚獄無濫卜袁氏之祚長長社不驚服張遼之才大列一等功加一級遷督標左營都司十四年天子南巡兩江總督黃文襄公

奏請來南其時江淮草木慕萬福之威名白下樓船奉士治之號令公亦感奮五內愛惜分陰警枕不欵吹鞭屢聽執問事之杖巡六合之城候啟明之星呼七萃之士以公爲丁都護能於席上橫刀以公爲陳元康能於盾頭磨墨以公爲太史子義能以章奏達天以公爲嚴尹安之能以手板畫地而且分甲乙而射丁侯之策顏息志眉呼庚癸而答申叔之求子囊甚口景陽植表暗合風雲唐營唱名不持文簿果使皇人受穀掌舍交權爰聞有光壤奠無誤文襄大悅題署督標左營遊擊攝城守營副將賦一鼓鐵張六鈞弓法同徙木之嚴慮比

煉銅之遠嗅溫簡輿之靴鼻威振六軍聞甘興霸之鈴聲風清一郡十九年王師征伊里
公請於襄勤伯鄂公願執珣戈從征玉塞公許之而未果也伏波據鞍之際每顧盼而自雄
東阿赴國之心雖未行而已壯二十年天子再舉南巡之典制軍尹太保以公本王筠之
舊手兼謝嘏之時才命乘餘皇從巡瓠子公出則軍思入則造膝無事不吝於心有策必成
於手伏弢咯血武侯抱疾以行棄馬爭舟慶忌短衣而往忽遭陽侯之厄遂覆周氏之汪春
秋四十有九嗚呼痛哉水鬪荆門吳漢莫援於馬尾風驚鄴下杜畿竟溺於膠船望磨訶之
載沉載浮斬蛟不起求丑父而三入三出援手何從空歸囊老之尸虞歌引路盼斷將軍之
樹秋月飛霜八月二日公子成信扶柩歸於杭州禮也公銳志功名死勤王事易人之所難
敢人之所畏廉可以不知白撰忍可以不寄青泥智可以偃儻豪強才可以臯牢天下崔懷
乍到滿坐禁聲太初發言疑籬避位眼中有鐵常森武庫之兵帶上無繩自縛南山之虎臥
籬籬而作獠舞擊舟楫而聽雞鳴方擬八翼冲霄一心捧日而卒之雄才厄於天命薦表恪
於停年壽不越五旬官不過三品劉鄩十步九計而竟少成功鄧颺四達八窗而轉傷非命
三呼蒼兕兩驂之游靡無靈一夢黃魔九原之丈人不救帝方倚用天不假年尹太保以
爲許穆卒師葬加侯禮紹宗溺水享配廟廷請於朝准陣亡之例蔭其嗣爲郎署之官然則
公之亡也又起止法孝直之卒丞相悲哀李將軍之亡老幼流涕而已耶以某年月日葬於
武林門外之西山乃爲銘曰

李家普濟入粗入細翁歸尹君能武能文奕奕我公與二人同如何不弔滅頂嗟凶豈龍工
可往未去衣裳豈持衰不謹劍躍龍堂我申其故溺人必笑惟臣心之似水故表明於蒼昊

常德府知府張古香墓志銘

夫禮樂之士敬容仁義之賢貴際說學之吏毋害慕古之儒絕俗四者非牟而難知實驗之有遂是以先王端本於庠序非進士不使治民聖人莞爾於絃歌必讀書然後爲學如吾友張古香者誠其選矣公諱開士字軼倫浙之仁和人五世壙僚一門穆行恭同機汜夏日行陽惠似黔敖禔年施粥此爲仁不富世濟其美之效也公生而孤露幼有異徵應邵懸弧神光照社虞延墮地白氣升天陸太夫人育而教之以席爲門編蒲作筆澤四經而頌學沿八索以披圖忘失猪羣有承宮之苦不知馬足有朱穆之專索冥則腸胃欲流詣微則雷霆不入余常同寓帝里見攬韋編雖屈元辰依舊申且不覺嘆曰溺苦於學乃至是乎公方以家少通書朋無都養復假館於劉智海借冊於元行沖將瓜鎮心把卷升屋不自覺其綿綴也乾隆

字映三

壬戌進士無須覓覺奪樊川之五名高宴慈恩步芳林之十哲

天子召見授銅陵知縣銅陵者江南凋劫之鄉皖上臬離之地也公解巾赴郡露冕班春士辨五施杜松中菴胥墾山開九削鬱棲陵鳥無荒文翁入都常餽博士何武到郡先詣學宮邑大災公請賑於巡撫范公范有難色公袖印再拜願乞骸骨范驚許之蕭育是杜陵男子言罷拂衣汲黯非河內使臣便宜從事時簡親王總督兩江聞之獎慰奏調桐城邑之人耆艾櫓輪壺漿祖道崔戎離華合郡持靴楊君去繁頻年輦粟未足方斯遺愛匹此謳思桐城盜張六韜誘某劫叔轉誣爲魁公超雪之六韜臨刑悔曰母若某之味心以陷人也西市禮佛囚就死以心甘東海覆盆民懽呼而天雨不圖此日重見高風他若察稻徵芒鞭絲見鐵履田而起髦士拔薤而弱強宗都可編作州書垂爲縣譜大學士張文和公桐人也謂鄂相

國曰吾鄉張明府今之龔黃爲公門下得人賀矣調南陵擢宿州知州時黃河灌城黑嶼肆
虐竈居樹上屋隱蘆中公大餽國人自程畚築流庸廣汎舟之役淖糜設續命之湯鳳敕未
頒發棠已謂魚符乍下振廩先空舛疫者於公堂蔭喝人於樹下不顧上池藥貴長府錢荒
有爲後慮者公愀然曰苟活民雖破吾家吾之願也居亡何 天子發水衡百萬治河公感
激益奮乃乘皮船渡木罌排梗湍瀾畝澮王尊立水三版不沉史起穿渠一鍤盡穫至今鴻
陂媚帝蟹堞宜禾竟障浮山無堙息壤公有力焉兩江總督宮傳高公兩薦公可太守 天
子授常德府知府 詔甫下而太夫人卒公本純孝至是毀哀子春食旨不甘曾無一溢崔
九風吹卽倒何待三年終服葬親竟以不起年五十九嗚呼痛哉公以叔寶之神清兼仲宣
之體弱幼而學也鐵搗竹素都爲咯血之由壯而仕也穀賊風蝗盡是傷生之物加以食無
過菜衣半穿空精久消亡年登大董一旦蘭陔泣血蓼儀廢書其何以取目南離收魂北極
也哉然而九重方召陽城半途捐館峴首未迎羊祐何處刊碑善人云亡海內痛之子敬持
秀出班行潛躬昧道有趙衰之文少連之孝以某月某日葬公於留下安樂山禮也大夫之
墓樹欒此日我思隨會寢邱之旁立廟他年人祀叔孫銘曰

我友古香真想在衿少不拾遺待人還金義心清尙聲蜚士林及腰銀艾公然健者能治六
雄以終五馬山甫將明諸葛奇雅曾賑姑孰救民水火移牧和州公曰不可命重在民爵輕
在我屢持玉尺平章人文捧出明珠光於天門有弟槃槃母侗好逸代公主進不傷折閱有
婿悒悒實惟我甥先公怛化公難爲情傷哉死孝當景收蘭黃堂未居白骨先寒我爲立傳
再銘華表傲佛劉寬兩碑更好

誥封奉政大夫丹陽縣知縣魏公墓誌銘

魏氏自元初從龍而南者曰寒臘公為內府總管賜姓魏氏起家鄣縣築室金渠弱翁之裔初興畢萬之宗遂大傳至嗣多公官虞衝司與 本朝相國文毅公為同支昆弟門標六闕坐列三貂爭鵬鸚而吼靈夔鼓吹有曲纂方書而序勳格班劍傳家再傳燕貽公生三子公其長嗣也諱蒼珮字長瑜黃菌誕野降生不凡白虹燭天自他有耀年十七補博士弟子即食廩餼契班符之九赤執東象之玉文饌斥邪蒿衣除缺衽雍正五年真定太守童華薦公世宗召見發江南以知縣用初攝寶山即標異政羔豚不飾鳥鈔無飢泉隨邑宰為甘鹹蝗與督郵共來去邑有藏真珠為奴竊者捕急奴縊前令繫主於獄公曰珠不得獄難定也乃偽賈人買珠於奴家寃始雪崇龜治獄先辨屠刀崔琰鞭絲能看鐵屑俱乎嚴棘共此神明居官三月遭父憂當是時 天子絕告甯之典朝官有墨經之文邑民借寇援此牽衣大吏留髡爭為上疏公薄方進之奪情慕薛修之終服齊衰不脫星見猶奔服闋來江知丹陽事時郡苦旱多火災公請天三日甘雨自零 酒半巡融風自息任延至而娶妻者二千戶劉昆來而學禮者五百人前令某以賊敗大府檄公鞠治公以為刑不上大夫也為具款之盡得其實俄而某訐於上曰是魏君之文致也代閉恥門反開怨府鄭以救公而致怒點乃好羯而弗知會與秉政者有嫌竟以讞獄非法罷官而某卒置丹書難逃金布公非曠閃乃為善之近名彼自崖柴終陷文而不活雲成翻手幻景須臾日出當心慈航已覆或勸公委蛇其道冀復職者公笑曰升沉命也遇合時也安有屈其身兼貶其道者哉孟敏破甑墮而勿看王晞熱官思之爛熟遂先期誓墓決志歸田其時矚公者褰帷感公者繪像盤中割耳爭

鳴張軌之寃鼓打紉如難挽鄧侯之去雖戴白垂髻滿地皆依馮異而千秋萬歲何時再見張綱古人乾時之戰以敗爲勝明夷之用處困而亨公之謂矣且夫不有合於人者必有合於天不有得於身者必有得於子故臧儋伯之家有後亦樂武子之德在人未十年公第二子廷會尹吳縣刺海州長子廷覲官新淦迎 鑾輿來金陵四子廷夔尹無錫公乃一條帶水朝東海而暮江南四領斑衣別中男而逢季子作傳餐之陸賈飲十日而未更似問安之子儀領諸孫而不識雖薛家三鳳爭長河東謝氏一門稱雄江左未足方斯榮盛擬此清華二十一年春遊姑蘇登惠山還舟清淮遂卒扳浦遺命勿設魂衣勿營佛事列晏嬰居賓位自有神交取堯典置棺中卽爲殉物嗚呼公之德也不稱其官公之亡也乃薨於路或者迎辛公彥之車駕偶下空中築白香山之仙龕原在海上乎不然而何以滕公四馬過漆室以悲鳴謝傅雙輪望高城而不入也年六十六子廷覲等扶柩歸葬柏鄉禮也公神采月和起居霜儉讀鹿鳴之詩而兄弟不忍獨食筮白賁之封而邱園常自幽探忘賢而賢與心期任性而性與道會善評書畫得卽贈人能爲文章成輒棄稿戚里師之友朋敬之莫不見子將而變服爲楊綰而滅騶諸子躬守義方克稱遺愛伏韜爲人作父自問何如王景以默名兒都遵此意枚情同分子誼屬通家贈我徽言常書三箴得公妄語足賭一繡往年獨拜牀前早荷牛心之炙今歲重逢吳下便成金玦之傷一束生芻漬無酒氣千尋元石淚寫碑文以某年月日葬於某銘曰

如春風起如方輪止麗褫拯人焦原仆己公薄子產不爲蠹尾彼乃要離蛛蟹之靡蒼天與直后土與理未竟其施以遺其子其子振振蘭茁其芽集於東南分張蘂牙公來就養舍飴

玩花一朝委化三萬總麻華表穹隆龜跌辟邪我書瓦屑非爲公家欲告後人厲假不遐彼
陰德獲報乃如是耶

汪君楷亭墓志銘

君諱孟翔字楷亭一字慵園唐越國公後也世居徽歙五世祖某遷揚州君有夷姤之至性
醇粹之妙德三年疇合咳而能言九歲知方梗其有理凡江總修心之賦公叔崇厚之論靡
不學於古訓被飾厥躬二十一歲補博士弟子當是時君父與三公以介特之身任禹莢之
業頽年綿惓絲灼多訛君屢試不第笑曰賈山涉獵不爲純儒子貢廢舉亦稱賢士詭時審
己安親爲上遂乃察數之機終轉勢之折閱藉夙沙之餘術得孔氏之雍容與三公雙臚雖
盲八旬愈樂家中列肆佯鬻貨以承懽掌上徵歌率閒賓而上壽門以內忻忻如也友于兩
弟穆若清風仲海季江時聞嫉宴侮臧甬獲絕無調言而且分漆室以餘光貸監河以仁粟
啜汁者麻集待炊者鶴望陽陵君論君子之富曰惠人不假不責食人不使不役君庶幾焉
乾隆二十二年 天子南巡兩江總督尹文端公命君佐其族敬亭公辦治棲霞君準考工
之古經權將作之大匠揆星置繫慮事量功發調水之符溪生白浪運開山之劍樹走青牛
煩壤剔而怪峯呈長廩高而碧雲接 乘輿三至君三供張 天子有文綺荷囊之賜遠邇
榮之一時從官僣僣捧手君能暇分殊事折輩測交僇飯佐其壺煖膚金供其行理李元忠
絹受一匹必烹五牛劉賓客日答千函竟用斗麪人尤感其義而服其豪也君娶余季父第
四女爲繼室伉儷甚篤三十六年妹以婉難亡君神傷不已烈火生牙呼晷年餘頰潰而卒
嗚呼痛哉君素無騰口之非竟獲噬膚之慘舌雖存而頤解飲食若流齒未綴而唇亡含珠

難殮斯人斯疾何罪何辜此再耕所以有芟苜之歌伯符所以有撲鏡之憤也余與君外託葭葦之戚內懷金石之誼筮日賓媚曾幾何時步爵嘗羞爲歡未泯猶記齊諧語怪疑古寺之燈青隋苑行春驚大隄之花豔白日如昨黃鱸已遙事斷前期天教後死其能無子桑一慟秦失三號也哉君卒年六十有二初娶陳氏繼袁氏子庭萱附貢生女適張氏以某年月某日葬某銘曰

陰陽於人如父使子非理相加順受而已君以善人而得惡疾及吾無身善惡如一山耶樹耶宰如者墓耶我爲之銘前定者數耶

客吟先生墓誌銘

夫不朝海若而滄浪之水清不入鄧林而會稽之竹美豈非蒼麟元豹隱見自殊夫不題肩羽毛互異哉若乃定性於大湫之天凝神於寂波之表霞舉千里冰襟一生則我客吟先生殆其人歟先生姓汪名舸字可舟晚自號客吟居士唐越國公後也有小心精潔之素篤行深中之雅薛瑩四五之間頗知自處子野三十以後不復詣人與古爲徒清臚若鏡海內載虹橋之馬骨持鳳尾之犧尊踵門而請益者如龍魚之趨大壑也乾隆十六年秋見訪隨園輔之入座鋸屑欲飛超宗見人不衣自煖相與辨題躐之新故析元儒之異同酒獻三巡禮終十反猶未知其能詩也已而一篇跳出八風齊鳴金絲引和雲霞凋色蓋嘗學禮淮陽吹簫吳市北擊燕筑南探禹書悠悠有感於山河歷歷盡交於烟墨秋竹積雪春風搖波未足比其逋峭也楚江觀察黃公相與有舊強聘同行先生食武昌之魚折漢南之柳較之他處尤數數焉人驚重客爭挹音塵吏敬參軍來探喜怒而先生履朱門如蓬戶狎貴介如海鷗

譬之神羊遊行不能羈也雲疊供奉鳥可褻也簿書笋束游目如盲騶唱雷喧飄風過耳避
華堂之絲竹偷聽漁歌泛洞庭之水雲自尋香草可以想其志之潔行之芳矣晚年歸里值
揚州有禺莢之變歲司鳩羽不無帶鬻家食緯蕭動致顛頷先生雖履道偶乖而遇風知退
竹有低頭之葉梅無仰面之花謝氏青山不少登高之賦鄂君翠被仍多緣情之作三十五
年除夕前一日自邗江襍被而至曰舸大不適將游武昌余留先生畢正臘乃行倜然不可
適楚飛滄盧之劍風雲亦驚彈琴去張翰之舟家人不覺瓊花之夢千里湘妃之簀一牀以
九月九日卒於武昌年六十有九嗚呼痛哉才子不歸空啼鸚鵡騷人長往半在瀟湘雖古
迹之傳聞亦此離之遭際若先生則瀟灑日月游戲人間可以掩衡泌而鶉居厭推車之蟬
攫矣而何以湯火居心雨雪促駕揚舲極浦怛化頽年遠尋墮淚之碑自走招魂之處豈其
中有不能自克者耶莫非命也其奈公何先生娶熊氏長子大衮次子大宗扶柩歸葬請銘
於余余與先生久託知音敢辭不敏故知騎歸黃鶴還假羽客之禽宅掩青松卽是幽人之
冢

銘曰以客吟以客死誰非客君獨爾客自去吟自存千萬春知其人

聰娘墓志

戊辰正月予衙大府泊胥江宿主人唐靜涵家集吳市之小星作魯莊之大閱招魚作媵呼
雉爲媒於是羅繻門排光妓階列車如流水爭來銜玉之妝祗若交竿絕少繫紗之臂則有
清臚窺牖綺語跨閭者月乍入而室明珠旁懸而星避主人謂予曰此吾家侍婢方聰娘也
君以爲姝乎則渠之目色袁絲非一日矣夫擇木者鳥也而木之擇鳥尤先憶雲者泥也而

雲之憶泥更巧思飛獲羽久經鳩鳥陰諧出手得盧何必神叢再博古有遇披香之博士識
慘綠之少年者殆其人耶予聞而感焉如端木之咏抽觴漢臯之逢解珮也爾乃相招以文
無相貽以警頁丹心寸意聽唱繁霜碧海青天誓同白水馳而加景當名夜度之娘泛可同
舟卽送朝飛之雉而無如事有難言者何也一江浪闊女膽怔忡五兩幣空儒門淡泊故雄
尚在施季叔寧許儷亡新特將行東郭姜詎將孤入阻之者伊戾調語力遏輕車豔之者游
飯生心思攘中路聰娘著能決惑水竟知歸夫愛子南詩憐李郢有換羽移宮之術八風皆
平無判妻別子之嫌一波不起一則心驚法喜小行郎初入華鬢一則身侍征西大將軍眞
爲田舍性如和璧觸手成溫香豈湘蘭隔簾嫌遠枕藏浮鬱三生聯踢臂之懽樹得靈檀百
事慰從心之願此固氤氲大使坤扇能牽亦由紅拂英雄神光獨注故也自此以後余解秣
陵之組還鷺嶺之山走函谷之關渡黃流之水聰娘無車不共有槳皆雙涕茜宜醪煩擱阿
錫羹調攪手便是鴛漿衣試神針都成鴛牒侍疾則眉愁滿鏡言離而淚落連珠或玲瓏歌
金縷之詞或嬌寵折琉璃之筆愛園林之春早笑折花來閔夜讀之更深怒擣燈去合宅之
花姑竹母盡說柔儀他鄉之龍媪雅娘羣驚采伴雙棲甌脫飛沙破粉以彌妍並坐餘皇白
浪湔裙而共拭攜蔣家行三之妹試華清第二之湯沃雪雖消凝脂尚在亡何清邱之社未
毀織室之星已災巫舞宛邱太姬無子蟬鳴茂苑齊女工愁翔風有房老之稱雲容少天師
之藥好孕惡育枚臯在而禱祝官亡弔夢歌離亢父召而靈妃步去蓋至於陽虧靈宅骨瘦
香桃聰娘亦自傷其終不起矣然而更衣旣久郎性深知嬌喘雖沉晨妝必肅羹湯強進慮
生大婦之愁簪珥分頒預作諸姬之別倩人寫貌眉小缺而猶嗔借女承衾手猶扶而不捨

一枝紅莖七夕霜飛乾隆壬辰孟秋卒於隨園年四十九嗚呼痛哉韋臯老矣今生未必重
逢紫玉奄然往事何堪追憶二十年前之夢雨三千里外之啼痕譬彼蠶眠纏綿絲在奈如
月蝕揆搔光沉雖籛室春多不少黃花續命而巫山雲散永無絳樹專房不能王相寵亡造
釋梵天人之寺且學代公塋妾勒館陶仙子之銘以某月日窆於倉山之西與夫子同塋降
女君數武禮也所願仙雲一片長遮弔鳳之山黃土千年燒作鴛鴦之瓦

小倉山房外集卷七

補遺

錢唐袁枚子才

代祝兩江節相渤海公七十壽序

蓋聞福者備也爲大順之統名壽者酬也乃至德之協應在昔金提力牧之佐雄陶方回之臣靡不班序顛毛榮膺大耋者何哉良以麟鳴遊聖鳳和歸昌含元甲之圖應中黃之讖中天景運生其間者算自長古帝耄期際其盛者道自合 朝廷雨露卽臣子之丹砂也宰輔精神皆國家之元氣也則有赤霄冒頂素手擎天奢龍作東方之臣汝鳩司北門之會百神薦祉備九德以宮陰陽萬物棣通先八荒而開壽域者其惟我渤海相公乎公以旄車之世族降河嶽之星精繡補經饒口成銘頌履絢冠鉢智極人天泗水分符海陽轉轂遷知幽邑再守榆林旣觀察於河西遂提刑於山左當是時也任延年少騎小駟以巡鄉羊續官清衣布袍而問俗夜無桴鼓合郡安眠路見桑麻使君便笑但招竹馬呼童子之迎不事衛參希長官之譽公之志桐鄉渤海皆可終身若無慕乎三圭之爲重侯九命之稱高爵也然而虞廷三載已多明試之功漢詔六條自有課最之舉臣如明月旣鍊魄於金門 帝有景風自吹來於天上遂乃戴雀弁握牙璋擢屏藩兼少府東織西織進堯舜之衣裳寬鄉狹鄉察楚吳之田賦理賑則澤鴻換色款關則英蕩宣風開府皖江軍民有喜色而相告宣防袁浦蛟魚聽號令而知歸著手成春無思不服 天子視公如龍門之砥柱故命爲制府而仍理河渠信公爲南國之甘棠故官拜平章而仍持旌節蓋公之遭際有得之於天者焉公之操修有信之於己者焉今夫日行黃道豈免躔度之訛星傍紫微尙有縮離之忒公乃半生赤紱

總是恩光一路青雲從無罣礙執江南之壤奠不以珍怪爭長顧北河之夫錢翻以恢台見賞同斷獄也獨信臯蘇同薦人也不疑蕭葛陳便宜之疏朝乍上而夕行除科比之條奏未終而 詔下三山開府猶攝篆於荆襄一日登朝便參謀於樞密祝 慈甯之萬壽領袖班聯賡柏梁之首章矢音丹陛長子唱饒歌而返畫像凌煙少君歌鹿鳴而來策名京兆志寵則銘鐘未盡紀勛則列笏難書猗歟盛哉古之名臣未嘗有也然而公抱姬旦窮窮如畏之忱屏魏其沾沾自喜之意耳鳴陰德坐薦謙衷脫帶常以腰舟過人不肯履影刺閨判事高柔常寢抱文書警枕傳聲蘇綽必手兼朱墨曾爲牧令能鈇割苛煩肯采葑菲自張施帖妥置札僑於賓位辟召英賢圖廉藺於屏風協和寅好百僚禮絕偏折節於儒生一品集成尙傾心於文史四時無燕居之樂終朝吹露冕之風乘馬三年不知牝牡封侯數日忘告妻孥惟其秉負也誠故其感應也速不知者以爲隔爐獨對李鄴侯結主之緣深其知者以爲昏夜焚香趙清獻格天之道大歲逢冬仲壽屆古稀 天子以正月十二日爲公豫慶於京師禮也臣思述職上計吏之封章朕欲見卿催鋒車於日下羹調天臘春滿梅花節近上元燈排火樹卿雲與佛雲一色文露與武露齊濃帝席星明大庖早具湯丞官肅上頓方酣九曲明珠穿盡禕衣之婦萬釘寶帶頒來俠御之臣帽結紅絨似黃人之捧日裘飄狐腋耐青女之飛霜王會圖成雖馬每牛俱賜鈞天樂奏督陽儀伯同歌依龍光者一月有奇頌名世者五百餘歲車回北闕尙帶香煙信到南邦爭傳士女以歲星之舊地增卿月之新輝嘉禾望氣以穰成德水未霜而波靜凡此編氓之福皆由仁壽之徵而公方且雪鬢不知冰襟如故料量民隱謝絕筦絃高侍中之聰強几杖虛設裴晉公之風貌海鶴同清當攬揆之時赴巡

河之役在元老以爲稱觴事小乘夏篆而四牡仍驅在蒼生以爲愛日心長過冬至而一陽始展某等行居子姓身隸帡幪逢申伯之生辰祝魯侯之燕喜未必邳州進酒韓稜隔千里而有醉容且喜祝史陳詞范武受徽言而無慚色敬張皇邸聊當悝鐘義不取諛文皆從實此日金鵝十二橫陳畫錦之堂他年銀管三千再記杖朝之事

陳涇南修禊詩序

夫芳晨不墜夫昔朝今彥豈殊乎往哲一邱一壑或友或羣如鐘含霜如水受月是以不學子晉而事同洛濱之游偶冀子桓而興同漳川之賞皆所以追緬藝林步趨逸軌也涇南陳子以永和之賢生上巳之日陶元浴素樹善測交探金虎之爻志在幽履讀蘭亭之序心希古歡遂乃仿鄭風作祓禊厭賓介藉網馮揚解若流闌水使曲同同之鳥熒熒之花高堂青龍之才張堪白馬之譽嚴助聊蒼之學孔晁紫宙之篇俱足抒寫景光自成馨逸流黃體素伯喈因之作書宵練朝虹愷之摹而入畫縱移山陰於茂苑起晉賢於九原啞其笑矣又何加焉僕也於越鄙人楚國殘客偶傾衿於半面遂圖形於九仙命作荒言書爲小引明知風簫偶過未諧雅奏之音或者木杧先鳴亦是同聲之曲

金賢村太守詩序

賢村先生東晉名流西豪望族夷吾澤四經之學彥和標七觀而談金心在中早擅鴻儀之耀銀手如斷遂歌鹿鳴之章以司民協孤終以上計得課最牽絲江左傾蓋金陵驟見子皮抒心元度館人竊屨之事能教返璧山中鮑生換馬之談遽肯踰閭燈下除非賈至許見瑤英直索紫雲不嗔杜牧此非聆音識曲送抱推襟者不能若是之好余也已而一麾出守黃

鶴樓高萬里班春夜郎國小可憐焦土新宮有不戒之虞趨以飲章故印竟攫拏而去捨二千石作六一翁在他人必且五噫歌成四愁交作矣而先生道然安雅不廢嘯歌清俸無多但買仙眉瓊葉歸雲有引惟聞梵宇清聲雖季文子之三窮三通蘧伯玉之再仕再化欒大天士張筠地仙不是過也於是飲星飯於霜潭解怪嬰於壁渚還洛浦走螭磯寓秦淮訪蔣徑當七夕牽牛之夕來諸姬墜馬之妝聚楞嚴十種之仙作刀跡入風之奏時則天鋪潭底月墜花間雲可妬羅風停吹雲散靈妃之步魚婢爭迎撥火鳳之絃雁奴驚起或班排阿鶯私說兒夫或女寄提婆乾呼阿嬾或珠飛纓絡舞出前溪或裙繫篋襪歌騰小海以嚴春佐午子使匏爵戲靈簫雙珮響而宮徵出於簾間千燈張而銀河落於樹上先生則手拋紅豆暗記樂章耳聽回颿遙知鼓節兩室如一公然張稷通家大會無遮何必王琨避面迨至星沉玉李而羣雌猶屬屐其間乳罷金詞而稚女尙嬰媿而笑有是哉此樂令人忘死至今使我移情可謂京洛之雅遊夷門之大會也已可奈地隔燕吳家分南北孔璋行矣公幹灑然小別三年空贈繞朝之策相思數字忽來蘇武之書長安先亡說少姜而於邑道南無宅借公瑾以羈棲翠羽拾來想華鎗疆環之舊影青泥封寄讀團雲散雪之新章雖元晏病風已枯半體而安仁感舊尙富千言爲金海之全編索玉臺之小序嗟乎言者心之聲也心不醉粹則聲浮文者情之著也情不蟬嫣則文敝少登臨之境者難豪有殷勤之意者好麗先生心波湛漢情岳干霄非制氏而記其鏗鏘愛童蒙而拾其香草能爲蠻語巧奪舌人好作音臣時夸耳學加以三吳弭節百粵觀風湘水濯其清襟黔山催其險句以披香之博士兼文陣之雄師偷入儒林定非谿刻就升天界也入華鬢賈生養空以遊德機常活龍叔背明而

坐方寸皆虛故能六管揚風三英耀彩歌離弔夢霜天聞清角之聲流景紆雲煙墨掩明珠之色鼓宮宮動喝月月行又何必飾混沌以蛾眉假荒言爲前馬哉然而蘭本願詳所湛曉鐘強半先鳴劉勰高才猶獻書於休文車下東阿貴介乃求序於仲卿夢中況僕與先生笙磬同音雲龍並駕如驂從靳以蚓投魚香火因緣喜靈山之有分白頭期限傷老物之無多倚裳聯襪之遊音塵不再信後傳今之作揚權何辭敢竭江淹將盡之才大書巢父長留之卷此日文章付我勝託妻孥他年泉路逢君再同賡唱

悔軒先生六十壽序

悔軒先生以仲冬之暢月爲花甲之良辰擯綏山之桃而勿採皮靈飛之經而勿誦乃肅袁枚而詔之曰明知壽言非古也然而相觀局外清矚瞭然乞言山中切人不媚子甯視余之攬揆而嘿嘿禁聲乎伏思枚與先生雖吏隱之途分實淄澠之味合臚言風聽側聞長者之徽音奮筆纂思頗記賢人之逸事與其橫陳於胸臆曷若布寫於屏風謹拜手稽首而爲序曰才非官也而才高則官自尊德非年也而德厚則年自勛鄧禹但期文學竟冠通侯顏含不信著龜偏登大耋此非志願有限休徵相逼以來實由操執恢宏造物因材而篤也先生生而孤露以席爲門長卽橫經將蒲作筆煨嬾殘之芋子舍篝燈折慈母之菱霜天課讀蓋張華勵志之詩江總修心之賦基於此矣登賢書之籍爲國子之師擠嚙道眞翼繹元化攝子陽之五縣走韋丹之八州初蒞三湘再臨兩晉斷絕尺一禁止槃游桴鼓無所發聲澤民不敢灰侈凡諸批牒排比成書枚受而讀之不覺嘆曰子產爲政莫如猛也魯莊察獄必以情也仁有所闕則以術濟之律有所窮則以意通之青霜紫電常照徹於五聽之餘愆子孺

孀必安置於萬全之地謝太傅稱陶公用法恆得法外意先生殆不愧家風者乎古人勅郭丹之事永署黃堂頒侯霸之文編爲令甲良有以也擢守淮陰旋遷白下送者持靴不去迎者挾轂爭先先生亦復攬轡沾襟留詩賦別所謂賢者使人不能忘己而已亦不能自忘於人焉先是淮有實沈大湫之神作沉竈產蛙之厄先生平其斂陷疏厥原防出入波濤扶持臬散王尊立水奪赤子於龍宮索勵射潮磨黃熊於寢外卒使城留三板炊滿千村 召對九重漏下六刻百辟動容而觀敷奏 一人前席以問生靈遂蒙簡在之知大有非常之用 天子不欲置汲黯於遠也故將赴淮陽而仍留近地又恐用馮唐之遲也故甫遷觀察而遽轉屏藩一歲之中章服屢換半里之內官舍三遷人但見其雲路搏風九萬里之扶搖太速而不知其仁心及物二十年之積累良多先生方且不損不加如愧如讓早鋤其色有睟其容闔門績紡敬姜自有家風散髻斜簪王儉依然儒者所到處一池之泉古跡必復一亭之月舊景重新短碣豐碑皆典秩明禋之式三廬五宿有義漿仁粟之供贈刀布以教生徒稅束薪而炙筆研簿書勞畢不廢賓筵呵殿聲希即聞吟詠至於今雖秩居二品車擁八騶而往往依念桐鄉好談京兆者其故何哉蓋道行於獨任掣肘無人效著於當年終身慊意古之君子易地皆然然而枚所怵耳而傾心者猶不在是也今夫君子表微陽善不如陰德哲人制行襲義即以重仁自臬俊風高而恢台之意少亦莊遠路失而趨進之道乖先生簿錄上官頗遺繩索迷留下蔡不諱風情似若徐邈爲通展禽非介矣而孰知小可略而大不踰外雖夷而中甚峻毛仲客滿不能致者惟宋璟一人江敦牀移所必遠者是僧眞諸輩此非勇過夏育行若伯夷者而能若是哉枚空山老矣一個陳人野服蕭然半塵輿草先生絕

無介紹早來雲外之車略得公餘便速幽人之駕覆瓿文字未識面而手已傳抄造膝清談乍脫口而心先莫逆此又牙琴之知遇薛劍之遭逢也已茲者白頭介壽赤袂斯皇千里生祠齊進狄公之酒一園葦竹爭歌衛武之詩家居東海瑯琊仙山最近署有淳熙古井聖水常春竊自比於鶴舞猿吟敢私獻其匏宣瓦奏公如黃菊勉旃晚節之彌香我亦蒼生願祝慈雲之永覆

謝渤海相公元旦賜豕鵝鴨等物及福字啟

大晴元日羣歌燮理之功春滿軍門敢忘起居之禮歲逢甲午律應東風出臥雪之蓬廬作向陽之草木手板投眾官以後吏隱途分荷衣拜畫戟之前山林人野蒙相公溫言婉下異貺遙頒橐倒困傾半是華堂之饌色招香引都非邱里之珍視若嘉賓賜之鳴鹿憐其傲態伴以蒼鵝特豚饋食之牲可以薦諸祖考泛水呼名之鴨兼堪寫入詩歌鄰里叩門爭看物來相府妻孥動色喧傳恩到貧家更有福字一箋爲老母今秋九十之慶枚伏思福也者求之在己而降之自天者也

天子爲九重福主錫之以與相公相公爲一路福星分之以與士女雲藍紙好光生柏葉之華煙墨香濃秀奪梅花之色北堂懸而慈雲永護白髮對而笑口常開不特此也公之愛士人盡知之公之用心誰能及之倘南衙篋竟教使者頒來則空谷煙雲難作材官犒勞公慮擾山中之白鶴特交車後之蒼頭如取如攜宛然父子家人之意式飲式食剛在椒盤春酒之天如此曲體人情纖微必到自見平章軍國雨露皆周物有盡而意無窮年漸衰而恩難報所有銜結之忱理合肅啟佈謝

爲章太宜人七秩徵詩啟

蓋聞甘泉畫象金母爲昭懷清築臺巴婦有耀翠媿元扈肇始於提蜚彤管絳紗夸稱於漢
晉何承天夙承母教夏侯氏尤明禮儀皆所以觀地道之成立女宗之式也矧璇宮夜織坐
少廣者七十年天姥朝遊獲祥麟者三四代豈可使雲仙彩伴競奏靈璈我輩儒林反無法
曲者乎恭惟章母黃太宜人系原江夏配適河間年甫及笄禮成合巹勸帥以敬循循帥氏
之箴參和爲仁媿媿碩人之德產寶家五桂剩崔氏雙鴻我封翁樸菴先生二豎方災三珠
增痛遽赴玉樓之召竟貽漆室之憂其時堂上尊章俱無恙也太宜人瑱環宵徹學嬰兒之
事親概散晨燭作季蘭之尸祭外則漚菅栽漆園林極土化之宜內則設鍵安橫門戶有金
城之固少儀訓子機聲與夜課齊清吉禮嫁姑束帛與儷皮不忒爲先靈卜窀穸禮備三虞
爲戚友饋壺飧河潤九里一門春滿七族風和崽子伶俜受小郎臨終之託彌甥孤露從嫗
孀拔宅而歸太宜人哺以膏履助其貲算卒使阿宜阿買都列官階王悅王筠竟成宅相此
豈昔之分羹轆釜別室銅盤者所得媿其懿範也哉我淮樹太守奉三遷之慈訓宣十部之
仁風隴右姑臧屢知赤緊京江白下再守黃圖比清識而水鏡無光吐赤誠而朝霞失色平
章荒政開汲長孺之倉協濟鄰封貸秦穆公之粟攘鞬小劫拔出萑苻懷磚巨豪散歸畜牧
決獄則諸囚禮佛一時之狴犴無冤興氓則損俸延師數郡之菁莪鬱起以故李憲三生之
祀黃昌兩日之歌業已大府傾衿闔閭額手而太宜人猶歆然其未足也淮樹每遷一官必
申一戒每平一獄輒加一餐定省之餘詢何以報 聖主含飴之暇計何以澤窮氓受暈翟
封章而身服七升之布居養堂丙舍而廚捐五鼎之牲與臺悉庇於賢雲侮甬都飲其德水

宜其壽隨年茂慶與善俱以丁酉暮春爲古稀華旦時則花明瑞室月在高藁鄰母當筵依然綠鬢崔嵬側帽親捧朱輪仲海季江四世之孫曾玉立前麟後鳳百年之綽楔風高古之人雖馮親上殿荀母從官象輿婉憚于西清冠帔頻頒於北闕迹其榮寵何以加茲某等誼屬葭莩情深邱里目擊柔嘉之則耳聞聖善之風敢替旃檀代揚奇馥願將闔範略舉梗端伏望當代之儒林丈人文貞學士不靳煙墨各贈琳琅或宣照於五聲或宏鋪於七體借文昌遠耀增寶婺之星光假書帶芬芳寫蟠桃之花色庶幾垂諸方策卽南唐女憲之書播入管絃續樂府壽人之曲

郡文學呂君墓誌銘

君呂姓名揚廷字對宸江蘇常州人也生即風神愴定有顏淵度轂之仁仲弓含澤之智白賁沃若黃流瑟瑟然年十九爲博士弟子二十二肄業成均鄭緩爲儒呻吟裘氏之地仲舒好學不窺廣川之園凡十禩之變三象之音九據之章七調之曲靡不穿穴名理淵通妙靈應南北鄉試不售遂佐周君某爲政陽高王壽焚書而舞班超投筆以行招我以弓視道若尺其時有火速軍餉應運會城者路苦盤陀人相愕眙君勇任之以三十須臾行七百郵遞驚虎墜澗攀枝登崖卒使龍節如期魚符應刻古之人雖子反乘堙欒枝斷轂卞莊子之怒目於菟怯威太史慈之通章計吏奪氣不是過也同里友吳啟文病於楡社署中君從陽高駮馬視之始而稱藥義篤眞長繼而扶輦送歸元伯或勸君應秋試者君泣然曰科第命也友朋義也吾不以彼易此矣其篤行深中觥觥類是君閒居有綢直之心遇難無倉況之色測交恥倚魁之行樹善記昔席之言蒙麗褫以拯人跼焦原而跟止以故邱里慕其風者莫不

證岑鼎於展禽誓要言於虞寄兄弟五人杜欽以小官最著學生一坐廩乘以末位稱尊傳曰上交下交銀手如斷其君之謂歟以乾隆四十三年卒其子府學生星垣秀出班行家傳緜裘庶乎潘子之後有尼夏侯之學傳建連遷陳詞乞予誌墓予思夫平子南陽之德深刻碑陰康成北海之風大書瓦屑亦文人之職役孝子之終事也乃仿南朝宗氏墓碣牒其世系妻女年齒葬所如左而爲之銘曰

星有光夜方起人有名死未已亢其宗更有子我銘幽逝者喜

孫淵如亡妻王孺人墓志銘

孫薇省秀才詩才傲詭能爲昌谷玉川家數予愛偉之今春二月以其亡妻王孺人事狀及詩索予銘幽予讀其樂府諸篇哀感頑豔丁當清逸故知完山之鳥無異吭之鳴雲和之笙有雙管之奏宛其死矣士也婆娑彤管旣淹元石斯耀謹按孺人姓王名采薇宜黃令光燮公女也有天紹之麗姿愠愉之修美天女九相靈芸三絕年十九歸秀才秀才故食貧者賦感婚時以帛拜代香纓孺人不槩於心能鋤其色守成湯嫁妹之戒捐夏禹修容之粉調言笈巢和之器治乾糲饋食之籩威姑以下愉愉如也每至玉女沙涼金蟲燈小釵橫三鑲髻妥半蟬孺人焚衙濕之香展排比之卷或抽觴以啟顏或論古而交謫誦靈飛之篇目王母心驚成蠶鑑之圖章南海紙貴秀才愛玩賢妻有終焉之志匪云嘉耦直是吟朋且其神識尤異儕輩常讀王章傳曰牛衣妻自賢奈沮仲卿上書終是恇怯女兒又對落英嘆曰人當如渠早謝慮有憐者何俟頽侵才捨恆幹耶味其言直以形骸爲桎梏晝夜爲一致采雲留影曇花愛空宜其拂衣行矣便登女媧之邱執手奄然難挽靈妃之步病成解亦態失嫵妍

卒年二十有四秀才開華鎗之故匣見都庸之舊痕哀思夕流憤泉朝湧遂乃詣宛若請神君執鬼中玩仙牒知孺人故是兜率宮掌書者雖迹涉幽渺莊士不言然浴羲女於甘淵奔純狐於月窟乃自古記之秀才鍾情語怪以妄塞悲當亦君子所不廢也以某年某月某日葬某原銘曰

驚女鹿佑楚客問天緣何彼姝以此名焉宜其奄忽離瑜復位當景收蘭臨華罷翠悵悵孫楚蟹行索妃歌離弔夢有涕漣洏椽娥臺高玻瓈魂杳定有青鸞集此華表

徐君禮珍墓誌銘

夫百卉具腓而含芳之蘭先隕朝陽方盛而棲鳳之桐早凋秀實難兼才命兩舛此哲人所以有沉牖之災暝臣所以有火色之嘆也吾於亡友徐君有深恫焉君諱維行字禮珍一字芷泉代爲著姓家於浙中遠祖諱壽者宋乾道間以侍御史出守平江愛玩洞庭之幽遂爲堂里之卜二十傳至毓菴公生四子君其次也執箕膺搗即已岐嶷束髮受經更加倜儻本申生之小心精潔慕莊周之抱德煬和如切如磋聞詩聞禮睦三昆而旣翕合七族以宣仁或立文翁之堂親炙筆研或捨周瑜之宅安宿賓朋或共建宗祠司屬役賦功之事或首襄荒政竭義漿仁粟之供凡邱里所錯憚者能以身先之庸流所辟倪者必以智決之長兄西圃先與余交招遊石公小住君舍如彼然明一言稱善遂爲伍舉兩度班荆當其作六日之留通一家之好時則露凝夜燭風警晨烏菜甲庖丁終宵置具仲霜季雪排日娛賓余心感焉如鰲戴石而君猶殷殷其未艾也次年挖支硎之小艇補春餘之墜歡柔姊臨波濟尼在坐月白勝水人嬌當花至今王侍中之才語蟬嫣孔北海之音情頓挫余雖老矣何敢忘諸

不圖龍華之會未終香火之緣已盡明淫入戾夢厲生災以庚子七月病篤召其弟心梅屬
曰修短數也我無所恨然頗貪沒世之名必藉傳人之筆汝其爲我持幣乞墓銘於簡齋先
生乎語畢而逝年三十有二嗚呼痛哉人之生也輕同聚沫人之死也速甚驚颿青曾黃頰
之推移瞽芮斯彌之變化彭殤同盡顏冉何悲然而元相臨終遺文盡交白傅荀郎雖少後
事竟託鍾君亦可謂神理之無差交情之素定者矣以某年月葬於某余不能躬趨馬鬣親
薦溪毛所冀名在月中仍復闕侯之位書留楹下永昌晏子之家

銘曰咸池五車氣通具區降此淑靈實生士夫悵悵徐君蹲循不爭神出五寸志入四行可
以測交可以樹善語笑未終天風吹斷楚鐸淪響周鼎沉沙衝星噴景難掩光華我欲攜劍
弔君之墓不挂崆峒挂君隴樹

陳淑蘭女子詩序

蓋聞天章有七襄之製知織女原近文昌璇璣迴八角之文羨閨秀能通河洛倫但稱針博
士而竟乏思功或喚作女大家而徒知陰教是則夜來善繡大捨知書不無遺憾矣若金陵
女士陳淑蘭則不然爾其早辨四聲工傳三絕銀缸五夜牙管一雙薄華鋌爲辱金借詩書
作膏沐拂來十指春浮三月花光寫入雙蛾秀奪六朝山黛當夫紡磚月墜鏡檻風低茗浮
鮑氏之香絮散謝家之雪往往流連光景陶寫風情揮毫而玉釧微鳴舒紙而粉痕輕落直
可傲左芬於晉代追三妹於劉家然而僕有感焉尤有幸焉從古星來天上不患無才仙謫
人間最愁失偶倫或戚施枉配茵溷空投或扇棄秋風或歌傷暮雨是則心珠夜炳不無淒
緊之音意蕊晨飛頓少風華之色矣而孰知所適鄧十郎者亦白門之佳士也詞標黃絹曲

譜烏絲分涼作荀粲之憐入室下樊英之拜湘蘭一朵常攜素手同看園竹萬枝能使全家
盡綠雞鳴窗而郎起香沉水而妾歌疊韻雙聲吟聞戶外唱予和女曲在盤中刻燭拈題競
賭八叉之韻拔釵沽酒爭爲一字之師雖秦嘉之詠素琴尙慙薄報而高柔之服賢婦敢不
終身真可使蘇蕙羨其聲華薛媛慕其福慧也已且又久著繡銘慣裁花骨不藉研神之記
自成手狎之文字字字生芒泯盡隳稟之迹絲絲入扣橫生彤管之輝非白傅之什不吟卿眞
知己惟士安之序是索女亦門生遺我一縑繡詩兩首作香閨之潤筆求駢體之擅場僕也
霜雪盈頭久傷才盡珠璣萬目又覺情生製作垂簾出入樂簪花之拂加添闊幅分明當錦
緞之貽報以數行弁諸卷首庶幾此日讀靈飛之篇目王母驚心他年獻南海之鑑鑿唐宮
動色

劉霞裳詩序

夫雲霞雕色有踰畫工之巧蘭蕙吐氣能奪迷迭之芬天所相者人不能爭中所無者外不
能鑠是以杜麟早聰勝於尙子之晚研也高鳳溺苦不如枚臯之夙悟也梁簡文云斯文未
墜必有英絕領袖之者劉生霞裳殆其人歟霞裳者山陰劉念臺先生之五世孫也產自清
門羊舌之族本大生於息土仲容之姣無雙楊收四聲早辨神口陸雲十六便舉茂才秀出
班行獨師懷抱以虔儼之逸性當慘綠之少年未免粉白修容膠青刷鬢瑤光奪壻粥粥爭
迎顧協晚婚綏綏求配摩登攝去將阿難戒體摩挲裴讓測交與孝基私情款狎終日毛醜
於酒肆一船橫盪於秦淮絕學捐書遷蘭變鮑致禮法之士飛言如雨而霞裳道然不顧也
以爲日月含蟲鳥之瑕不妨麗天之景圭璋無瑾瑜之匿斯爲前席之珍古之人忽細德之

險微作風雲之奢闊賈逵通健借袴便行元孚沉酣負瓊遠走思話自纏腰鼓征西好佩香囊凡此儻募俯張夫亦何傷於奇士乎則有賡餘主人張三昧之燕騎兩家之驛招余目色彼此心傾問字則甘作侯芭遊山則願爲禽夏遂乃倚裳連襪負笈從征台宕訪春匡廬觀瀑星飯黃海水嬉洞庭聽仙奏於幔亭候初曦於衡嶽當是時也江中潮起似答吟聲馬上花飛欲催綺語對奇峯而筆健折芳草以情深或弟子儂言請更一字或先生低首爲賞數聯道衡爲文使顏籀拈仲寶搖管招彥酌商取聰明智慧於陸眷口中學柱指鈎絃於師囊手上五年來油油焉翼翼焉其聆音識曲授色知心雖莊惠濠梁鍾牙流水無以過也今年春從二萬里而還有三百篇之製清章雲委藻思芊綿振敏絃之逸曲鏘鏗鐘之雅調余勸其板而行之霞裳蹙然堅謝不敏余曉之曰昔崔瞻舉世重其風流致才華見沒良可惜也子以輕剽單慧之姿加旭歷銳銀之學余豈不知似川方至如日在東方將奏遙響於鈞天何必蜚英聲於早歲哉然而休文遲暮才遇王筠元則門牆最憐雕武趁予夜燭助爾晨燈好束沼繩同爲商榷庶幾初荷出水百卉斂華雛鳳鳴霄萬流傾耳此日波瀾莫二杜陵識所由來他年秋夕諸篇元相存爲少作

贈儒林郎翰林院待詔厚齋項君暨姚安人合葬墓志銘

君諱庭模字啓東號厚齋祖甯菴公由徽遷杭不受耿逆僞命歿祀西湖父文松公州司馬素襟清尚遠迹崇情賦江總之修心佩朱穆之崇厚固知兆傷環之休衍何籌之慶矣君生而愴定長更徇齊蔡謨通明人呼朗伯君游倜儻世號聖童八歲時父體不斟私詣吳山神廟祈以身代病果得瘳童子何知至誠則動元穹雖遠有聽斯卑弱冠補弟子員英聲揮綽

庶士傾風見者以公輔期之先是文松公達人之見學陸賈出裝愛子之心爲薛包分產君道箭分易折枝披自傷富在趨時不在歲司鳩羽金能自化何必責收薛中於是盡合許武所分助以南申奩費買遷禺茨布置牢盆志入四行神出五寸遂振白圭之舊業法孔氏之雍容焉然而燕雀所賀非鴻鵠所欣也紈袴所甘非志士所願也君以爲華身不如華國多積尤貴多文懷西笑之心作北征之賦乃以家事交其兄端友公而已則由鄉貢入太學崔稜一到舉坐禁聲太初將臨名流拂席或賫刺走尋或致書結納羣以爲蔡公儒林之亞賀生達禮之宗非君莫屬焉庚午舉順天鄉試甲戌補翰林院待詔方領矩步久著風規玉府木天更嫺掌故以詩受知於慎郡王東平辟士特取吳良梁孝延賓最高枚叔於此應觀翰音之登慶茅茹之拔矣不意蓬山路遠風雪易侵長安久居金貂就耗丙子春以事罷歸公業遊宦田園半蕪息夫邱亭侯名空富君以爲青蚨可去而復還荆樹易凋而難茂竟學繆彤之閉戶不問馳誼之治裝決意中興空拳搏戰漸看珠熟不怯錢荒會太夫人年衰臥病君奉佛爲醫因心制藥上池飲而穀食安咳華榮而蘭芽茁逮至萱堂以壽終而君年亦將老矣遂乃路遊東粵論著桓寬爲羣商籌出納之資爲內府核盈虧之數雖韓嬰精悍公綽聰強不是過也已而還鄉訓子顧己尋涯啓樊重之居大開瑞室做君卿之俠招致清流則有杭堇浦吳西林王述堂汪西瀨諸君大雅扶輪升堂接踵酒鎗宵擲詩牒晨飛旗鼓相當珠璣亂灑奉夏侯以四馬百人之食但覺其豪置春申於一臯五散之間各行其樂蘭臺諸彥盡文陣雄師金谷主人爲騷壇領袖余以己亥之春掃墓聖湖亦得送抱推襟與分一席焉王楊盡逝傷李嶠之獨存羣紀齊交欣孔融之有幸故鄉金蘭之簿雲霞之交微斯人其

誰與歸君雖身在邱樊而心存葵藿道小草雖微都知向日羣峯在下誰不尊天以故陳咸思入都中楊僕恥居關外 皇上南巡江浙君兩祛高蹶星夜迎 鑾湛露所濡龍光必照

恭逢乾隆五十年正月四日 皇上舉行千叟宴禮君年逾花甲應 詔赴都當是日也萬

春始華千齡方且百神薦祉五老來朝散太極之飛泉開八荒之壽域君得與濟濟者英皤蟠元老屠屨其間樂聽九韶酒斟百末鶴髮耀乎丹陛鳩杖錯於彤庭朶殿香烟歸猶未散

天家頒賜重不能勝 皇上賞文綺雕盤奇珍無算 欽定所呈詩冊入 萬壽盛典昔

桓榮陳車服於庭前夸示子弟韓竑寫姓名於屏上許作詩人以古較今於斯爲盛君疾惡如風赴義若熱蔭噶人於樹下見善必先回寒谷於律中惟力是視在衢州有孕婦不能踰嶺者在京師有僕人不能遠娶者君傾囊助之劉翊舍其車馬不告姓名趙憲濟及婦人同聲稱祝君之陰德耳鳴皆此類也委化之年纔六十有八遺命棺衾悉從儉約祇設伯夷之杆水供茅君之虛位而已嗚呼君翼翼之思未終槃槃之才乍展崔駟巨儒位終邑宰管輅絕學官止府丞命之所存數難強也然而信義孚於人忠誠格乎物辨岑鼎者必取信於展禽作誓言者多要盟於虞寄采采蘭訊置驛通賓蛇蛇碩言聆音識曲今雖九原不作五噫空歌而聞風追溯者誰不對酒而憶公榮臨風而思元度哉夫人姚氏雲臺望族東里名媛凡浣石建之中衣聯姜肱之大被炊黔敖之粥指子敬之困莫不贊自閨闈助之簪珥補班昭女誠作顏氏家箴有脊有倫如幾如式先君一年卒子墉秀出班行耽心聖籍通五際微言識六家要指可謂潘氏之門有尼夏侯之學傳建矣以某年某月某日奉柩合葬於某原禮也嗚呼武擔山上任文公何日歸來靈芝宮中王平甫此時復位

銘曰文饒髻齡號張曾子君懷至性孩提如此賜不受命商可言詩蜚聲闋苑金躍颯馳富而能施學如不及盲禿僂厖皆君所活身雖逝矣情尙蟬嫣其纓禁緩其容簡連化臺禪窟石秀土堅定生福草書帶芊芊

贈中議大夫孝廉隱谷孫君暨范太淑人合葬墓表

夫熱中者務進嗇神者主守慕古者絕俗兼愛者喪我四者殊轍折中難焉若不夷不惠非仕非隱清名尊於士林厚澤沾乎鄉邑所謂得天獨全與道大適者我隱谷孫君眞其人也君諱宗濂字栗忱一字隱谷杭州仁和人幼而岐嶷長多閱覽少與兄宗溥才名並馳躍豐城兩劍飛平輿二龍兄旣入翰林官給諫君亦登賢書上春官不第罷歸當是時君以蘭成射策之年曼倩上書之歲舉頭見日呵氣生雲孰不思三沐三熏再接再厲而君志在幽履意薄軒朱停計偕之車占肥遯之卦以爲四科尙尊貨殖三旌不換屠羊貿遷所以厚生推解可以樹善何必戀此微名效碌碌者蘇而復上哉於是陳揆五行炊累萬物因其_地鬱立以駢牢范蠡能謀秋儲善算蓋不數年而貪賈降心研桑側目矣雖然能聚而不能散者倚魁之行也能散而不知道者刀墨之民也君以爲萬善所先天倫之事百年難得孝養之豐於是廣鍾嶸之居潔君魚之饌仲江季海擁侍無方北雁晨鳧應念即得太夫人病亟君狀體暗室投冀有靈讀禮二年毀幾滅性幸封翁之常健也乃聚同志以博歡心極宴嬉以永愛日凡三儒五墨之客雕龍炙穀之賓及冠竹皮帶櫛具善格五妙彈棋者莫不拮裳連襪酒賦琴歌蓋所以養曾參之志而成孟公之名者其在斯時乎且又義重嵩衡財輕籛籜骨肉粲而不殊戚里待之舉火乙亥歲大禋出粟千石饑民鳧藻旱魃失威大吏請旌於朝

君猶歆然於己其友陳明府廷獻遠官雲南君代爲治裝資其捧檄旋以憂歸貧不能償君益自喜謂成渠廉吏不負鮑子之金償我素心速焚田文之券疎戚吳某寄食於君齒猶未也而君爲營美糲曰使及其身親見之安死後之心豫凶何害慰老人之志引養彌長僕因之有感矣夫君子在上則美其政在下則美其俗其假人也不德不責其食人也不使不役是以周尊九藪漢重八廚子夏恥礪仁齊桓畏宿義散賞錢郭震因之稱英雄也犒牛酒樊宏所以頌盛德也彼夫穴管之見眠寢之流高踞台衡終歸隴斷魚魚逐隊躡躡稱廉何曾有益蒼生書勛彤管也哉方知尊不在官賢不需位蕭育卑官是杜陵男子蘇純儒士號三輔大人君之謂矣所嘆者善人是富生可無慚造化無心奪之偏速君雖持梁刺肥何嘗燒其爛蠹青芝赤箭亦足保其谷神乃精神淵箸而體不能克服散雜投而藥終無效疾深三縛形敝五倉竟以不起嗚呼痛哉元髮歸泉垂髻扶柩鄰春不相薤露空歌說者求其故而不得乃疑君爲善近名拯民所阨得毋萋叔違天而有咎伍胥逆行而生災乎余謂君逸情雲上陰德耳鳴生雖有涯死而不朽斯則壽之大者又何必與元鶴齊年共靈椿爭歲耶夫人范氏卽母太夫人姪也鐘瑾母妻李膺姊妹兩重骨肉一脉心情洗手作羹供張椀巖和衣侍疾親滌械阿君旣歿奉事封翁扶筇林下忘西河之傷含飴花間看諸孫之長折蓂立教拾芥成名奉繡佛以清齋誦般若而終老君之得成夙志夫人與有力焉先是君好廣置曹倉精排艱架壽松堂中有嫺嬛祕笈伯山漆書會 朝廷開四庫館令嗣仰曾獻二百餘種 天子嘉之 御題乾道志原本還俾珍藏賞佩文韻府全部以彰寵眷王氏兒賢守江左青箱之學班家恩重 賜內庭冊府之書倘非燕翼貽謀安得龍光照耀嗚呼榮哉君以

覃恩贈中議大夫子三人仰曾鹽運司運同傳曾甲午舉人候補中書儀曾國學生孫某以
某年某月某日與夫人合葬於某

小倉山房外集

卷七

小倉山房外集卷七終
四會...

小倉山房外集卷八 補遺

錢唐袁枚子才

禮親王世子詩序

世子以天孫雲錦之才兼淮南食時之敏清襟蘭郁逸藻雲飛德無常師詩兼衆體詠物則明珠九曲上手能穿弔古則夏鼎千年聞聲欲起或題畫而烟景都生紙上或懷人而珠璣盡落風前豈徒河間輟絃且使東阿却步所謂星分少海定有奇光筆洗銀河自饒仙氣福慧所鍾非偶然矣乃復禮士親賢攜謙請益鈞天雅奏空谷傳來不棄衰氓教之加墨枚久居物外忽聞緱嶺之笙翹企層霄竟聽寶雲之曲回環雜誦齒頰生香已爲老子之踞觚敢不瞑臣之躅足謹遵寵命恭綴小言以荏叩鐘將蠡測海此日觴開八秩強作江郎才盡之文何時夢入九重來賦梁苑初升之月

思元主人詩序

山中風好天上書來捧碧海之紅珠珊瑚尙濕解王孫之雜佩漢璧猶溫大恩壓己以心驚薰沐開函而下拜方知主人爲高陽之鞠子本帝禹之精苗翠鳳棲桐丹魚在藻年方弱冠早登蕭氏文樓思若流波不數魏家典論或慕唐宮進士作賦千篇或學魯國諸生誦詩三百詠物則絲絲入扣歌風而飄飄凌雲偶託卮言以儒爲戲時參妙諦著手成春無一言不深入元中無一字肯寄人籬下溯天潢之派波瀾自異人間披帝女之桑枝葉都非凡卉所謂羲車五色雲蓋千層江漢水深風雲天闊未足方其昳麗也更復飛耳審音傾衿禮士以謙虛爲坐薦兼覽百家奉走卒爲神師不遠千里憐長途之老馬索弁語於空山伏念枚輅

固齒衰僧虔筆秃赴京兆鹿鳴之宴尙待明年試乾元鴻博之科已周花甲方掩扉以終老
忽大任之相加有若五鳳樓成修補命編茅之匠九天樂奏賡歌招擊壤之氓其能無忍愧
於顏知難而退哉然而投瓊太重結草無期寵命旣宣堅辭更妄此日聞呼必諾敢逃聲於
牙曠門前何時著翅飛來得隅坐於鄒枚席上

陳檢討填詞圖序

填詞圖者前輩其年先生遺像其從孫望之中丞所摹刻也先生太邱世德岳珂原少保之
孫驚座家聲蘇過是黨人之子伯始少聞庭訓元方早負時名氣得春先思爭花發審韻則
解呼雌霓揮毫而慣賦雄風浸淫百家足抗班香宋豔鍾爐五典能兼樂旨潘詞恭逢我
聖祖仁皇帝立賢無方求才若渴掩八紘而取俊闢四門以達聰特開博學之科許入鴻文
之館先生彈冠拜命簪筆登朝折紅杏於瓊林花皆富貴聽鶯聲於上苑鳥亦聰明撥天而
色煥雲霞擲地而聲流金石高文典冊九霄傳司馬之詞章風語華言舉世誦香山之樂府
未免國風好色我輩鍾情李翰文枯便奏音樂景文修史劬列紅妝或吟罷而即令傳抄或
曲終而重爲按拍流目送笑有美一人嚙徵含商教其三弄開第孝侯之里遠山青入眉邊
浮家少伯之湖春水綠湔裙色傾耳當筵樊素一串歌喉費他記曲韋娘幾升紅豆墨磨卿
手釵掛臣冠眞可謂風流人豪自成馨逸者矣則有技擅虎頭巧超周昉者爲寫傾城顏色
兼傳名士風流一則長鬢飄蕭拈花微笑一則雲鬟窈窕對酒當歌有睂其容美矣麗矣呼
之欲活是耶非耶蘊藉衣帽勝瀛洲十八士之畫玲瓏指爪宛霓裳第三疊之圖於是廣召
名流各加題品傳諸好事同作解人霞駁錦摛皆一榜登龍之彥筆歌墨舞聚 三朝吐鳳

之才百斛珠璣爭飛紙上六朝金粉半墜行間豈非希世之丹青傳家之墨寶也哉中丞本高陽之後世有通侯生通德之門出而開府當燕寢凝香之際欲賦閒情抱芬芳悱惻之懷難忘祖德集羣賢之佳什遂甲比以成書因後進之同科乃郵筒而問序枚弱齡弄翰卽慕蘭成老去看花常懷騎省當 聖主登幾之日卽願生入洛之年 盛典再逢公車被召遲公五十七載瞻黃之 恩詔重看徵士百八十八人慘綠之少年得與當時陳實渺矣晨星此日袁宏公然碩果辱教弁首卷中影照驚鴻竊喜華顛紙尾偏叨附驥嗟乎名流何限言不乏替人詞客有靈孔璋也應識我指點吹簫仙子揣量題帕神情不憂才盡江淹只恨生遲杜牧欣團扇覩放翁之貌老眼頻揩似眉山題太白之真音塵若接假使操絃度曲恐難分絳樹之雙聲若教駢體論文喜早竊南豐之一瓣

宮闈雜詠序

宮闈雜詠者邵明府無恙先生所作也先生劉輿才長晏嬰身短以潤古雕今之筆寫芬芳悱惻之懷遠結古歡工爲才語拾鉛華於彤管遷次就班散烟墨於香奩無徵不信上稽瓠史旁及稗官意蕊雲飛但願佳人再得葩華萍布能教逝者重生妙手白描隱隱呼之欲活音塵若夢姍姍怪其來遲較王母之從仙已過十倍考劉向之列傳更極千秋尤奇者褒牝雞爲樛木儷元妻於湘君南子因拜聖傳名啟母以生賢換局哀其窈窕輒神往而曲致纏綿縱有過差亦心憐而巧爲開脫華言風語寵柳驕花萬古蛾眉一齊膜拜韓嬰曰和者好粉有殷勤之意者好麗其作者之心情乎揚雄云綠衣三百色如之何其編排之人數乎一時目論者動謂貴賤羅麗貞淫奪位蕉萃與姬姜並列勾欄偕袞冕齊登譬之蘇峻與唐堯

何堪對坐法興詣江瀟定喚移床未免擬人失倫歌詩不類不知宣聖采風鄭衛與周南相繼武梁畫象萊妻與曾母偕描歡喜海中人天同隊虹霓屏上姍女紛來揆厥初生都是媯皇苗裔考其世系誰非堯母門楣五際宏開八風並奏此詩教之所以爲大也至若天女摩登地示富媪如來之妻法喜昂宿之竊梁清太元賦之清要承戈眞誥篇之靈籥匏爵娟娟此豸全屬荒言概用刪除具欽卓識頃蒙先生遣使索我弁言嗟哉賜也賢乎老夫衰矣春蠶未死剩有餘絲蟾魄將沉空留殘照一旦深情帖下士女圖來恍若羅袖排門翠笄窺牖手披靈笈儼金屋之裝成目炫花牋似仙裙之留住因之望古遙集忍俊不禁雖國風之好已終而見獵之心忽動廣披竹素再作搜牢獻馘首媯盈等六十人合周天之數以多爲貴足張娘子大軍美不勝收盡黜虞初小說凡北里志妝樓記情史豔史等書美人不下三千遺珠而束皙補亡或者彼姝知我

清娛閣合刻詩序

夫合璧必須雙耀偏絃不可獨張當天下有道之時我絳子佩喜家室和平之日鼓瑟吹笙典籍所傳人風可愛然而星名織女不近文昌鳥號鳴鸞或隨啞鳳盤中伯玉後無嗣響之音天壤王郎轉有不平之歎得毋兩美不許齊眉天豈無情人偏有憾乃余讀清娛閣合刻而有異焉合刻者京江張舸齋居士與其室鮑芷香夫人所作也一則江夏黃童天資超絕一則宋家若憲質性靈明未納幣而戚里稱才已結褵而房中有曲女兮窈窕士也婆娑或吐石含金共作雙聲之奏或鈎心鬪角爭爲一字之師拈毫則雙管雲飛聯句而並頭花發旣切磋於枕上遂偕老於詩中眞可謂異曲同工雙烟一氣者矣雖然言者心之聲也詞者

意之表也。倘片時目反，則眉黛難描，六鑿情乖，則宮商不應。作者俱能含章，司契抱德，煬和夫憐而熨體，分涼婦淑而拔釵，欸客親調美饌，人游護世城中，勸散義錢，名播金蘭簿，上當其茶烟濕鬢，梨雨催妝，邀月圍棋，折花射覆。皆詩中語問字於掃眉才子，妻卽先生徵文於坦腹郎君，卿真吟伴，寄遠則裝棉恐後，當歌則得句爭先。亦詩中語若非福與慧兼才，同情擅者，其能兩集編成，三公不具也哉！僕桑榆之景暮矣，通家之誼久矣，初與步江居士韓孟聯交，繼與雅堂省郎紀羣作友，今歲再遊天台，弭節京口，又得見蔡氏文姬，劉家快婿，夔牙並奏，孔翠羣翔，是有緣焉，何其幸也！更蒙推許，誣諉題詞，嗟乎文通夢中之筆，久被郭璞追還，玉臺新詠之篇，敢不徐陵作序。

公祝奇麗川中丞五十壽序代

蓋聞兩戒山河，江左是歲星所照，百年上壽，五旬當受爵之初，況開府之邦，三吳勝地，神明之頌，萬口同聲，則凡身受陶鈞耳親提命者，其敢不寫畫錦於屏風，奏雲璈於燕寢也哉！恭惟麗川中丞閣下，雲在絳霄，靈鍾丹水，年裁弱冠，便簪上苑之花，官飲秋曹，屢擅祥刑之譽。內辭郎省外，作監司，褰帷則劍閣雲開，揚旆而桂林風暖，江南有福，扇仁風者，將及十年。桴鼓不驚，持節鉞者，又過三載。公之雄才大略，人盡知之，公之行事居心，伊誰諒之。今夫聰明者，每失之刻，公正者，或流於迂，警敏者，待物少真，幹辦者，操心多蹙，公則容光必照，何須察察爲明，著手成春，不肯沾沾自喜，愛惡必形於色，使百僚知所從違，成見不挂於懷，故方寸毫無適莫，案牘似秋來之葉，風掃皆空，更胥踏冰上而行，心皆自怯，獄無小大，必與平章，官有賢聲，都膺特薦，憫東征運糧之卒，給賞棉衣，坐南衙清德之堂，別張賓館，劉宏不設從事。

而澄鑒如神包公洞開重門而關節不到繫詞曰惟深也故能通天下之志惟幾也故能成天下之務公之謂矣尤奇者今秋黃河水決高堰堤危公駕一臨而風伯回輪蛟龍避道適有雲南運銅數巨艦沉入波中頃刻金精變成銅壩抵當風浪得下芻茭公乃捐俸以祀馮夷之神撈銅而免滇員之累亦可想見人天協應福德兼隆之明效焉且夫處脂膏而不潤人笑君魚入寶山而空回誰為王烈牢盆有例獵較何妨公乃身署鹽官心遊雪嶺秋毫無染半菽自甘凡在旁觀都嫌太過直至淮西事發而牛奇章簿上無名都護賊聞而宋廣平殿前獨對然後知公之高掌遠躡燭照幾先此豈中才以下所能企及者哉然而公猶慊慊然不自滿足也大行不加鑄本色書生之印小善必錄藏故人殘稿之詩謂幕友侯統漁道稿交隨闖入詩話屈入騶而病訣黃堂聞風者皆為泣下謂馮太守閱遺孤而時遺白鑷感恩者直到泉臺公待孫春臺撫

軍遺孤庭誥傳家義方垂訓都下郎君之薪水俱有章程階前執事之紀綱半通文墨求賢若渴布衣皆與平交觀過知仁相士都從格外裘輕帶緩苛禮全除風語華言拈花微笑諸葛君之張廬設竈盡是經綸謝征西之置履裁裙總教得所至於取沐鶴溪邊之箭射必穿

楊製風輪海外之燈光能奪月拈一韻而風人擱筆餽一藥而貞疾恒瘳此又名臣游藝之餘情菩薩神通之末節也已今者獄降台星值趙衰可愛之冬日籌添海屋折王曾曾賦之

梅花公有和高啓梅詩九首某等身隸幘幘衙參鈴閣或遠離千里批牒常頒或近侍崇轅光風時接見王丞相而人人意滿對樂彥輔而個個神清池中欲舞神魚境內皆生福草分大賢之仁

壽活全省之蒼生恐傾東海之觴難效麥邱之祝敬陳皇邸當作悝鐘義不取諛事皆從實此日立言立功立德儘書十二金鵝他年杖鄉杖國杖朝再付三千銀管

恩賜世襲雲騎尉羅漢門縣丞陳君墓誌銘

當鐵雨金風之處獨標碧血爲國殤以哦松射鴨之官忽作鬼雄於海島人斯忠矣典亦隆焉公陳姓諱聖傳浙之山陰人曾祖理慕蘇桓公號大人有何比干之陰德官廣西司獄因寄籍焉祖廷綸官按察使父齊襄官江西廣饒九江道公幼而徇通長尤愴定以乾隆壬午舉人得鹽場大使候補福建兩充同考官助朱衣之點莫濫齊竿拔毛穎之錐共推秦鑑秩滿例轉知縣忤上官意調補順昌丞仁風不墜中牟競說魯恭鸞鳳偶棲蒲亭頗聞仇覽中丞徐公命權知樂縣事年餘仍調臺灣丞駐劄羅漢門檻可觀魚方靖鯨波於碧海篇懷寶劍竟招殺氣於蠻疆蓋不數月而林逆之難作焉時乾隆五十一年十月也公奉委守斗六門斗六門者臺北要區賊攻甚力公以枳棘一枝固藩籬於絕域赤棒二挺撻戈戟於千山契箭傳呼革言三就葉公免胄民見面而心安子產成列盜聞風而氣奪我心匪石衆志成城十一月朔賊大至豺牙宓厲雪刃如林虺毒潛吹黑雲壓地公本書生慷慨作名士指揮挺丈八之矛鳴兩甄之鼓惠施力小操表綴以臨城童子才高變徽章而誘敵怒喝則雲中鴈落橫揮而刀上毛生激以義聲空罅皆爲明鏑置之死地烏合盡作鷹揚蓋寇來而却走者數矣無如短袖難舞危條易風以井堙木刊之餘當蟻聚蜂屯之衆紙鳶信絕銅馬鳴張正月二十一日賊又至公自知衆寡不敵乃鳩村民百餘分爲兩翼以便夾攻雖一個宜僚足當五百而孤身楊僕難召千夫矢射營中王霸焉能安坐瘴生壺口馬援不冀生歸振臂而瘡病雖興飲血而鼓聲忽死或勸公退公叱曰吾祖父世受國恩此我報恩死義時也與僕顧景馳二騎直入賊營大呼我縣丞陳某特來諭汝降也賊怒橫加矢石遂遇害於溝

仔背莊公死時距王師平臺又十閱月矣嗟乎公之節人盡知之公之心或未諒之當夫矢盡道窮勢孤援絕棄城而走誰能遽責張巡赴敵而亡亦足追風周處而乃頭可斷而氣尚雄口將閉而聲更厲不肯佞朦塞責尙思操刺成功當時文紀入張嬰之壘昌黎伏廷濬之軍皆以捐命妖巢收功虎穴使蛾賊稍爲天誘狗奴不復崖柴則醜類無迷復之凶神聖有包荒之量不勞天兵於萬里全安海國之羣生公之功不世出矣無如事合前人而成敗異也氣吞小醜而聲勢孤也叱馭聲高初效霽雲斷指致身事畢終爲溫序銜鬚嗚呼痛哉公嘗遊會稽山遇道士授一古鏡曰爾生平事業可於此鑒之後官閩中嘗對鏡嗟吁及渡海謂家人曰吾明年其死於難乎家人駭問終不明言是則張悌不去軍中前期早定郭璞自知死日正命爲難春秋五十有九賊平事聞天子賜葬祭世襲雲騎尉村人張啟感公生能愛民死能盡節爲石函斂公首加碣標識故事後得歸元焉嗚呼千里歸來杲卿之髮尙動一靈不泯先軫之面如生元配邵氏繼配祝氏例封宜人子廣潤以某年月日葬某銘曰

茫茫海外歎讎陳公原圖保障遽起兵戎倜然神勇絕不怛恫鳴鞭集衆投筆彎弓徼風大隧射隼高墉先庚未備後甲誰從以死報國含笑從容惜哉著述散失波中賴有聖恩恤典優隆千秋綽楔鑒此孤忠

重修錢武肅王廟記 代杭州李太守作

乾隆五十七年亨特承乏紹興敬修東府錢武肅王廟將王子孫文穆忠懿諸王像配我聖朝敕封賜祭諸大典都已詳載矣今年守杭州是王發祥之地而祠廟頽侵日光穿漏尤

非所以宣 國恩慰民望也謹葺治宏整而爲文以記曰惟王抱囊括八荒之志退守方隅
以保障兩越之功恩留桑梓金虎嘯而風颯動玉虹起而雲霧消州領十三世傳一百子南
夫也楚園君哉然當其時十日並出不見太陽八王興兵誰爲共主外多銅馬大槍之寇內
有貫高蒯徹之謀王雖崛起臨安收功宣歙而車無兩廣田少一成其何以整頓山河創垂
基業也哉迹其始末有不可及者七焉王除夕鼓琴戒酣長夜深宮易帳費省青繪警枕橫
陳耳觸銅丸之響包山板築身甘運甓之勞能作詩歌斥爲餘事善畫墨竹不以示人知天
步之艱難勉耄期之不倦其勤儉有如此者王神勇超羣當機立斷或入海而擒徐約或捲
袖以斬漢宏或假八百以誅黃巢或擁兩藩而備行密弓張强弩江湖避威文祭靈山海神
借地絕域之蠻王受册羅平之妖鳥藏聲至今百會亭高奇謀可想三峯石立羅刹猶驚其
雄略有如此者王館號招賢殿名握髮四方之士連袂來歸一技之能芻蕘必采沈崧誇兩
度月宮之到羅隱比千年河水之清胡岳面有銀光驚呼奇士何逢陣留戰馬悲憶將軍較
之鑿齒依桓宣武於襄陽管寧投公孫度於海外事相仿也禮更隆焉其用賢有如此者王
除苛解燒捍災恤患纔頒春服又與冬衣旣建石塘還加竹籬田撈蕒草通水利於五湖風
送珠船富南琛於四鎮聞譎諫而魚租遽捐於使宅祀蟲天而飛蝗盡墜於江中禱寶石之
山祝羅城之水以老夫之灌灌作赤子之扶扶世方喋血以事干戈我且閉關而修蠶織漢
番君惟効忠於主徐偃王不忍鬪其民其惠下有如此者王蓋世英雄依然本色少年負販
不惱椰揄拜老嫗於車前聽喚婆留富貴唱吳音於酒所教聽內苑宮商石鏡重看王者之
冕旒真矣金尊分散滿村之父老醺然厚待故人那有夥涉沉沉之歎矜憐妃子笑唱花開

緩緩之歌樹披錦以生花劍倚天而吐氣其豪宕有如此者王生有紅光空聞甲馬幼能指
羣兒爲隊伍老猶決勝負如神明練樓船則甲滿五千畜海馬則廐盈三萬假使大人虎變
尙父鷹揚誓蒼兕以定中原按黃圖而取天下作翼漢尊周之舉必梟雄斬勒而還上可繼
創業之少康下可作專征之西伯而王乃守老聃之知足學子產之惠人不填西湖以待真
主偶得國璽便獻中朝雖風雲進取非無庾亮之才而根本深謀自愛桓沖之計稱臣納質
虛而與之委蛇近交遠攻坐以觀其成敗惟承順得四境之安乃專斷行一王之制其職量
有如此者王家有賢嗣門無雜賓孔晬孔愉聞詩聞禮衛青三子襁褓皆侯神慶一牀象笏
皆滿夢綵繩之圍宅兆徵奕世簪纓張燈山以對門尤見天家恩寵魯無篡弑故稱秉禮之
邦周有遺民尙愛甘棠之樹以小事大本子輿氏之名言納土如歸得忠懿王之繼志較之
南唐兩姓便唱檀來西蜀十年遽呼孟入馬氏之衆駒棧鬪歸家之九龍帳空判若天淵誰
爲妍醜其家法有如此者嗟乎五朝泡影國祚幾時十國沙蟲音塵若夢惟王壽享喬松名
高渤海石床奉佛銀鹿弄孫天寶紀元而當時不以爲僭雞豚徵稅而至今猶諒其心三節
還鄉而恩綸大沛二龍避道而晚節彌謙玉帶名馬所好存焉鐵券金章榮施極矣然而漢
帝還鄉魂猶戀沛留侯封爵心尙思韓王生於臨水里之鄉廟在表忠觀之側謹以某月某
日興工以某月某日告竣較會稽棟梁尤加旃飾嗚呼丹青式煥何如鸞手之寫生袞冕端
臨尙覩龍神之不睡讀蘇子瞻之文尙嫌其簡覽皮光業之碣又苦其繁乃爲銘曰

唐帝祚終大王風起武肅桓桓天人來矣日角殊形星衡異體有能有爲知己知彼能鬪不
過得當便止地建勛州河開德水鐵亦知時鼓能記里亭淨斗牛田生仙米河東竇融西涼

張軌一樣忠純九重恩禮才大志小終身歡喜寵極五朝澤流千禩
劄緝奉牲壇非泰厲昭示來茲安行仁義世世子孫銜恩罔替

聖主南巡遣官致祭

